

宣
統
新
疆
圖
志

新疆圖志卷九十八

奏議八

國朝 對策二

請止安集延商人領俄路票赴新疆貿易並附俄漢纏各回及
哈薩克人衆越界滋事摺

首逆逋誅請飭使臣向俄理論解送懲辦摺

新疆南路西四城興修各工完竣並籌辦應修各工摺

接收伊犁及分界事宜現籌辦理情形摺

科布多所屬布倫托海無庸撥營駐紮片

俄國駐喀領事權飭局員兼顧片

請按約索還烏什之貢古魯克地方摺

俄商往來新疆貿易不得行銷中國土貨摺

規畫新疆郡縣摺

請止安集延商人領俄路票赴新疆貿易並附俄漢纏各回及哈

薩克人衆越界滋事摺

竊准幫辦軍務廣東陸路提督張曜咨開安集延部落與喀

什噶爾境地相連風氣最爲狡悍從前擾亂南疆大爲民害南八

城掃蕩後流寓之安集延悉數驅逐出境本不准其再來惟該夷

現歸俄屬許俄通商該夷卽在其內如查非向時驅逐之人應准
放卡與商民一律看待其安集延貨物天山之南祇准在喀什噶
爾一處銷售不得分赴各城漫無禁止等因比經分別咨行照辦
嗣准張曜咨稱據安集延商人稟稱俄國駐喀領事官發俄票十
二張凡安集延商人無論何城都能去得具稟請示等因上年秋
間疊接喀喇沙爾游牧之土爾扈特南部福晉文報伊犁西北哈
薩克部落越境搶掠牲畜並將牧夫縛去比經追捕則翻珠勒都
斯逸逃該福晉由伊犁招回逃亡三百餘丁行至控吉斯河腦被
哈薩克搶去羣馬一百八十五匹報由善後局轉稟到營經行
文咨查究辦旋准伊犁將軍金順覆稱俄屬之哈薩克及漢纏
各回時出搶劫駐卡官兵種種受害咨會俄官嚴禁置若罔聞拏

獲到案俄官必索回不辦等語先後咨會到。行營准此。維交鄰之道莫如通德類情取邊之謀尤貴防微杜漸非熟審交涉利害情形預爲申約一旦因事齟齬重煩口舌小者尙可遷就了結大者甚至支節環生牽掣大局履霜之漸馴至堅冰不可以不慎也中俄改定新約第十二條內載准俄國人民在伊犁塔爾巴哈臺喀什噶爾烏魯木齊暨關外之天山南北兩路各城貿易標出俄國人民四字本非他部落所可影射安集延雖歸俄屬究非真正俄人如果該夷素號馴良與中國邊民夙無嫌怨則聽赴各城貿易與俄國人民一視同仁有何不可無如安集延羊很狼貪累世稔惡道光五年之張格爾十一年之玉素普同治三年之布籽罕牙和普擾亂新疆類煩申討此次怕夏阿古柏乘中國關隴有事不暇及遠遂盜距南疆各城犯順以來殺人不以挺刃有所讐惡輒餌以毒藥登時斃命纏回幼女自八歲以上悉被姦淫死者十常七八又誅求無厭終歲取盈其最慘者纏回亡一家長安夷

酋長恫喝之曰爾家財產係爾家長所積家長既亡應將財產悉數充公有不繳者則非刑弔拷一旦夕間而纏回人亡家破流離失所矣似此殘忍暴虐迥出情理之外纏回人衆莫不痛心疾首飲憾至今光緒三年_臣率師規復南疆查明安集延人流寓各城者尙二千有餘察其樹怨於纏回甚深必至耦俱相猜終啟邊釁疊經咨商前陝甘督_臣左宗棠札飭各營局稽查明確設法放歸安置免貽養癰之患乃四年冬間卽有安集延逆目阿里達什潛入布魯特糾衆犯邊之舉五年春安集延又與布魯特合謀入寇漏逸逆酋阿布都勒哈瑪與愛克木汗條勒兩次糾衆大舉犯邊經_臣疊次親督各營出卡兜勦痛加斬馘逆燄始熄搜出賊目金山身藏俄官路票兩紙咨呈總理各國事務衙門存案備查並先後訊據賊供逆目阿里達什初出犯邊係由俄官處告假潛出其阿布都勒哈瑪與愛克木汗條勒由俄糾衆內犯時俄官姜達卽屬以此行務取喀什噶爾城池否則不准再入俄境故該賊酋在

烏魯克恰提卡外聲言奉俄國號令攻取喀英各城以上情節均經左宗棠專案奏報其賊中搜獲俄票數見不鮮尙有未及陳奏者綜觀往事安集延狡滑凶頑甘爲俄國鷹犬纏回遭其荼毒幾於不共戴天近年張曜駐軍喀什噶爾各城頭目紛紛具稟請嚴禁安集延人往來回疆免滋擾害等情言之痛切易大傳曰凡物之情近而不相得則凶際此互市初開若安夷與俄商漫無分別彼將恃俄爲護符遇事猖獗生風勢所必至纏回積怨生忿兩不相下尋釁報畔將由此起中國官吏約束固慮其難周卽俄國領事徇庇恐亦有所不及也臣又查關內外積年逆匪竄入俄境者甚多俄人堅不交還北路自綏來縣以西時有游匪肆行搶掠一遇巡防嚴密之處則僞爲商民販貨貿易稱係已歸俄籍之人莫可究詰金順來咨卽有叵測情形難以枚舉之語難保無白彥虎餘黨乘間攔入以作不靖今安集延之可慮如此而若輩之滋事又如此若准其持執俄票運貨赴各城貿易姑無論燼餘逋寇死

灰尙慮其復然萬一各城纏回追念夙憾出其不意攘其貨而戕其軀甚至鬪毆拒殺緣引無窮曲在彼則故爲延宕曲在我則徒貽口實彼時辦理棘手更不待言故中國於安集延欲求始終弭釁自以不准通商爲上策然彼既附俄俄終得以有詞再四思維惟有指定銷貨地方俾有所限制而不至於蔓延則兩得之道也謹按歐洲各種公法有通商不可強逼之條就中俄盟好而論陸路通商不便原許酌商辦理有咸豐十年之續約第十四條在即新約改定通商章程亦並無安集延民人字樣現在新疆稅釐既免一切包庇營私之術無所用之遇有真正俄人出入往來尙當隨時保護以敦和好卽市噶爾愛烏罕克什米耳巴達克山各部落在我有羈縻弗絕之誼亦應廣示懷柔獨安集延爲南疆百姓所深憾通商實多不便而積年竄俄逆匪及附俄之哈薩克人衆假稱俄商越界生事俄國既不申禁而發覺又不肯懲辦踵事效尤後患伊於胡底邊疆遼闊防不勝防小有疏虞動搖全局

總總過慮實不能已於言相應請

旨飭下總理各國事務衙門照會駐京俄使熟權利害轉行俄國駐劄新疆各領事官遵照此後安集延商人貨物南路准在喀什噶爾一處銷售北路准在伊犁一處銷售毋須發給路票分赴各城以保商務而消隱患彼如謂安集延卽係俄人應准援例貿易要必與俄使約法凡安集延前此從逆之衆如彼纏回讐殺不得向中國官吏求爲申理其附俄之哈薩克與伊犁新疆俄籍之人亦祇准在伊犁兩城貿易以便中俄官吏會同譏察俄國領事尤當隨時嚴加管束毋任滋事至中國竄俄之漢纏各回均係百戰死黨習不畏法應行文俄國與白逆一同禁錮不得縱令爲害致傷和誼言前定則不貽或亦籌邊之一道也 爲杜後患而重邦交起見是否有當謹會同幫辦軍務伊犁將軍 金順幫辦軍務廣東陸路提督 張曜專摺具

奏伏乞

聖鑒訓示施行

光緒七年二月初十日

首逆逋誅請飭使臣向俄理論解送懲辦摺

竊逆曾白彥虎以其黨馬壯及安夷阿古柏之子伯克胡里等久爲叛逆關內新疆遭其蹂躪迨大軍痛勦窮竄入俄因敦睦鄰之誼姑未加兵一切情形經左宗棠奏報在案四年二月二十二日欽奉

諭旨總理各國事務衙門奏新疆首逆逃入俄界現與俄國使臣理論情形一摺逆首白彥虎與伯克胡里及馬壯等均逃入俄國境內經總理各國事務衙門與俄國使臣布策理論據布策而稱及其照會均謂咨報本國本國於此事能查照條約所載辦理仍須左宗棠照會圖爾齊斯坦總督等語白彥虎爲積年惡首罪不容誅現與伯克胡里及馬壯等竄匿俄疆亟應執約理論令其迅速交出以免死灰復燃致貽後患著左宗棠查照總理各國事務

衙門前函卽日行文俄國圖爾齊斯坦總督並令劉錦棠先行就近行知務將白彥虎等照約解回聽憑治罪未可稍涉大意該衙門王大臣仍不時催詢布策轉咨本國後究係如何辦理亦不得稍涉鬆勁等因欽此仰見

聖謨深遠除惡務盡至意左宗棠與先後欽遵行查而俄官以收養難民節詞見覆上年崇厚使俄所議條約又未載明等正深疑慮因已另簡使臣未卽論列昨承准總理各國事務衙門來緘知使臣曾紀澤已換新約奉

旨准其畫押所議若何不得其詳既蒙

俞允何庸再爲顧慮惟白逆等如何交出仍未開議及愚昧之見有不能不詳陳於

聖主之前以備芻蕘之採者夫通和事關久遠利弊必須熟籌當此定約之初正可理論之際商務則宜防其收羅外部遂被浸廣之謀略華商而擾地方猶其後矣界務則宜防其佔踞要衝予我

孤注之地失鉅費而得空城猶其小矣至索取逆酋則尤當務之急不可度外置之者也白逆等負其豺狼之性濟以剽殺之謀倡亂歷年黨羽景附其於各處之軍情勢又無不親歷而周知當其逆燄方張固有衆莫敢撓之勢及其力窮出竄亦未忘致死於我之心數年來引奸出亡喊黨入犯之案層見叠出現在餉項奇絀亟應酌量裁勇以節糜費亦因此而不能一旦解散當

天威遠震之時大軍壓境猶頻有邊警若數年之後防軍凱撤邊備稍鬆該逆黨羽之散處內地者尙懷往日樂亂之情其隨從竄俄者亦有思歸故土之意窺隙伺便起而乘之卽不必俄人誘使不必白逆躬爲而內之奸民外之黠虜亦或有借以爲資而起者雖小醜不能有爲而師動費隨不免重煩

宸厪且各將士之與該逆角戰各地方之被該逆殘害者無不欲得而甘心若與俄通和之後卽該逆不復爲亂而昂然出入藐我將吏虐我民人坐視其橫則難銷積怒者之憤追誅前罪則易啟

左袒者之嫌不惟

天討莫伸亦慮邊陲多故至其爲叛人之連轂敗外部之戎心因事而構間是非輸誠而教敵戰陣斯又棄刑章而養邊寇事在意中者矣自古通款尋盟必弭虞詐苟有收亡納叛豈爲睦鄰溯查咸豐十年所議條款內載凡有重罪人犯或逃入境內一經行查卽將該犯送交本國按律治罪等語今白逆之爲重犯人所共知成約具存豈容收納况此梟獍之徒飽颺饑附在我則爲法無可寬之大愆在俄則爲材無可取之匹夫若違約庇奸又示下以背叛之道想亦俄人所深惡也所仰荷殊恩忝司邊役不敢緘默於此日而貽後患於無窮乘此和議初更尙堪補救惟有仰懇

聖明仍飭總理各國事務衙門與彼國駐京公使執約理論或令曾紀澤向俄言明務將白彥虎等解回或就近押交與金順張曜營中恭候

明諭再行懲辦以彰

國法而快人心其隨該逆竄入俄境者亦悉令押回分別辦理則邊境永安而邦交益固矣至此外如何通商如何劃界使臣當已擬定無從置喙所有首逆逋誅急應執約理論以靖後患情形謹繕摺馳陳伏乞

聖鑒訓示

光緒七年三月二十八日

軍機大臣字寄光緒七年四月十七日奉

上諭劉錦棠奏首逆逋誅請飭使臣向俄理論解送懲辦一摺劉錦棠以曾紀澤已與俄國另立新約白逆等如何交出未聞議及急應執約理論不可置之度外等語白彥虎一事前於二月間據曾紀澤電寄總理各國事務衙門詢及辦法當以此事自須論及應否卽議或俟換約後再議由曾紀澤審量辦理經該衙門由電報傳旨寄覆曾紀澤接奉此旨當能相度機宜妥爲籌辦俟曾紀澤奏到時再行諭知劉錦棠遵照將此由四百里諭令知之欽此

新疆南路西四城興修各工完竣并籌辦應修各工摺

竊^臣自光緒三年率師克復新疆南路各城治軍之暇兼籌善後事宜目擊地方彫敝情狀知最爲切要之務莫急於興水利以除民患通驛路以便行旅固城防以資守禦疊經咨商大學士前任陝甘督臣左宗棠次第舉行數載以來頗著成效回疆西四城水道以葱嶺南北兩河爲最著烏蘭烏蘇河由喀什噶爾城南折而東北經牌素巴特龍口橋各處以達瑪喇爾巴什又數百里入噶巴克阿克集大河是爲葱嶺北河今所謂紅水河是也葉爾羌托克布隆河與噶羅布河合流於城東之莫克里莊東北行經愛吉特虎各軍臺繞出瑪喇爾巴什以東數百里至噶巴克阿克集地方與烏蘭烏蘇河會是爲葱嶺南河今所謂玉河是也玉河東而大半依傍山麓河岸佔高西面自愛吉特虎臺起至阿克薩克臺止綿長四百餘里河岸較東而爲低河岸之外向築有長隄一道咸豐年間以後河道久未疏治河岸與長隄久未培補致陸續壅潰多處從前旣未隨時修濬迨經變亂逆酋不恤民困更無有過

而問者以致年深月久愈壅愈高愈決愈寬河水從各決口洶湧
四出徑由瑪納爾巴什以上直趨喀什噶爾之烏蘭烏蘇河並不
率由故道自愛吉特虎臺起至察巴克臺止數百里間田廬漂沒
驛程梗阻城堡坍塌而瑪納爾巴什地方本爲回疆東四城赴西
四城咽喉要路因地處低窪遂爲羣水所匯竟成澤國派員前
往查看勘得賴里克臺東二十里決口一處邁那特臺東二里許
決口一處又東三十餘里決口一處阿卽格臺東十五里決口一
處又賴里克台以下三百餘里河中壅有大小沙洲十餘處估計
工程極爲浩大而民瘼所關不能不急圖拯救因飭陝西陝安鎮
總兵余虎恩提督湯彥和陶生林劉福田李克常已革總兵楊德
俊等各帶所部營勇兼督民夫堵築決口挑挖沙洲並將老岸及
長隄加高加厚軍民分段工作以次蒞事隄岸均臻穩固河道一
律疏通其瑪喇爾巴什一城向多膏腴之地自河水爲災渠隄盡
毀居民靡有子遺飭提督陶生林方友升萬勝常知縣文培夏

等將該處大連渠小連渠北連渠逐一修復並飭多開支渠以備蓄洩一面招徠流亡散發牛籽農具難民漸次復業此興修葉爾羌所屬河渠工程之大畧情形也其喀什噶爾烏蘭烏蘇河之水不獨喀城之民資其利以耕作卽瑪喇爾巴什地畝亦賴以灌溉因兵燹久未修治於龍口橋上面二十餘里衝決一口河水直注玉代里克各台經提督湯彥和楊金龍等率帶勇丁民夫相度地里開挖支河以分水勢堵塞決口以截橫流由龍口橋以達玉代里克卡拉克沁屈爾蓋各臺本有可耕之地特以渠道久廢旱潦無備遂致土地荒蕪臣飭提督董福祥張俊開濬渠道引龍口橋之水以灌玉代里克一帶散給貧民牛具籽種俾資開墾自龍口橋以上如英阿瓦提牌素巴特和碩阿瓦提大阿爾圖什黑子爾普巴依托海雅賣雅七克托蘇灣浪浪各水渠河道均以歲久失修或沙石淤墊或堤岸潰決先後飭道員羅長祐提督董福祥張俊侯名貴同知王維國等一律修整完善此興修喀什噶爾所屬

河渠工程之大略情形也以驛路言之自光緒三年冬窮追陝回安集延賊多掘水斷橋以緩我師大軍所過率係免水踏冰而進倉卒不及修整重以葱嶺南北兩河水患方殷西北自喀什噶爾城南烏蘭烏蘇河上游起西南自葉爾羌之愛吉特虎臺起均至瑪喇爾巴什察巴克台等處止每當伏秋盛暑諸山冰雪消融河水暴漲近河各站一望瀰漫悉爲巨津道路橋梁蕩然無存凡轉運驛遞暨往來各項差使迂道而行率多遲誤商賈裹足稅釐減色官民爲之交困自兩河工程經始卽飭道員羅長祐提督張春發段柏溪總兵劉必勝在喀什噶爾城南各路修大小橋梁三十餘座修平道路數百里飭同知王維國在七克托地方修橋梁二座飭提督湯彥和楊金龍修整龍口橋玉代里克各台橋路並飭陝西陝安鎮總兵余虎恩提督李克常陶生林方友升已革總兵楊德俊等自愛吉特虎臺起至瑪喇爾巴什察巴克台等處止搭造大小橋梁二十餘座道路一律平治又查回疆西四城各台

站亂後舉目荒涼居民無多凡轉運暨各往來差使員弁以無駐宿公所每多佔住民舍居民房屋卑陋糧餉軍裝時多疏失之虞且恐不肖弁丁藉差滋擾遺黎不堪其苦因分飭各路營局就近在於各站蓋造官店以爲經過差使人等棲息之所此興修各驛工程之大畧情形也以城防言之喀什噶爾葉爾羌英吉沙爾和闐漢回各城自同治初年回疆叛變以至官軍克復疊經圍攻屢有損傷各賊曾本無遠略並未隨時修葺歷年既久傾圮愈甚其各城倉廩亦多破壞以致城內不能廣積軍食因通飭各營局將各城牆垣門卡暨濠上弔橋概行補葺完善並添造倉廩以資儲峙又喀什噶爾葉爾羌兩城之外教場地當扼吭向各有演武廳一所極爲雄峙久已頽廢亦經一體修造用復舊觀而重形勢此興修各城工程之大畧情形也以上所修河渠橋路官店城倉工程本皆浩繁且回疆土地非沙卽鹼厥性輕浮消長無常興修工程非多用人力萬分結實鮮不旋修旋壞加以大亂之後百物昂

貴民人稀少若一概取資公家所費不知凡幾。辦理各項工程係半藉營勇半資民力各軍弁勇自有應領糧餉無庸另給食用此外由各善後局轉飭各回目糾集民夫民匠帶赴工次歸督修之員調遣所有夫役皆係被災窮民仿以工代賑之法每日給發食糧惟所雇民匠除日給食糧外仍按日酌發工價銀兩其購製木料石塊甄瓦石灰鐵器暨應用各物並運脚犒賞民匠工價諸費均係挪用軍餉所用糧料係在徵收糧石項下支放各項工程係於光緒四五六三年內先後興修陸續完竣均經委員勘驗並無草率偷減情事歷經咨報左宗棠有案並經分飭各營局督率各阿奇木伯克隨時保護以期永久竊見回疆西四城自興修各項工程以來閭閻鮮水旱之憂行旅忘跋涉之苦轉輸文報無慮遲延田賦稅釐漸有起色則非諸將士踴躍從公之力其效或未易臻此也再查新疆南北兩路自遭寇亂十有餘年地方糜爛已極各處城池衙署廟宇河渠暫難盡復舊規雖經左宗棠暨等

極力籌辦先其所急然以言百廢具興則當期之十年以後現在南北兩路應修工程尙多卽如瑪納爾巴什因久被水災城垣盡圯正在鳩工興修又如迪化州綏來縣精河鎮西廳等處城垣均多頽廢亟須修葺喀喇沙爾之開都河隄岸葉爾羌之圖本舒克各臺渠壩亦須整修各工程或業已興役或正在勘估疊准烏魯木齊提督_臣金運昌咨商並據印委各員稟請前來_臣細加查核皆地方應辦之事未可以煩難勞費稍涉因循惟新疆地屬邊荒又值久亂積罷之餘一切情形與內地迥異大小各工程若必依照例章勢將拘牽窒礙於地方轉鮮實效凡遇應修各工程_臣惟有督飭承修各員切實舉辦務求完固需用銀糧卽在軍需項下暨地方入款內隨時籌發力加撙節以期費省事舉於邊疆有所裨益所有回疆西四城興修河渠橋路官店城倉已經完竣各工並新疆南北兩路尙有應修工程現籌辦理情形理合恭摺具陳伏乞

聖鑒訓示施行

光緒七年七月初二日

接收伊犁及分界事宜現籌辦理情形摺

竊^臣承准軍機大臣字寄光緒七年五月十六日奉

上諭接收伊犁及分界事宜前派錫綸會商金順相機籌辦現在曾紀澤與俄國新訂約章業經批准一俟互換後俄國派有大員約定在何處交收卽著錫綸懷遵前旨馳往會晤並著升泰一同前往按照曾紀澤新訂條約及所繪界圖妥慎辦理此事關係甚重務當與劉錦棠金順張曜詳細籌度總期界畫分明永昭信守不得稍涉輕心致貽後患等因欽此並經總理各國事務衙門咨送改訂條約前來^臣維收城分界諸務事體最爲繁重非熟籌審處不足以杜流弊而規久遠欽奉

明旨命錫綸升泰與^臣詳細籌度^臣等自應竭誠慮所能及互相商榷務臻周妥斷不敢以

朝廷派有專員意存推諉惟^臣駐紮哈密距伊犁喀什噶爾暨沿

邊等處程途遙遠文報往還動需時日若錫綸升泰凡事必與會商勢將多費周折轉虞遲誤意收城畫界二者遇有重大緊要須與聞之處錫綸升泰知會到即當舉所見與之商酌以期有所補益至其餘一切事件均有定約可循錫綸升泰自可就近會商金順張曜辦理較爲便速其新疆通商諸務此時固宜豫爲籌及然必俟俄國領事官到日方能定妥豈是屆時當會同金順張曜按約開辦伊犁收還時金順自應率部進駐該城昨得其來緘言及所部行當拔壘深以餉項支絀爲慮軍餉需雖同處艱窮之會然亦不能不勉爲挹注即當量力接濟資其前進該軍啟行時應由金順申明紀律務令秋毫無犯將來伊犁善後諸事宜卽由金順遴員設局與隨時會商辦理以愚見竊謂伊犁居民其願遷居俄國者既須照約聽其自便官軍到彼總須嚴禁擾累善爲撫輯藉以維繫人心否則子遺之民將相率他往徒得空城亦甚無謂至從前被賊迫脅情有可原之民教人等

應由金順按照新約第二條恭錄光緒五年內閏三月二十四日四月初七日兩次

恩旨會列_○等前銜就近出示曉諭以廣

皇仁再查新約第五條內開兩國特派大臣遵照督辦交收伊犁事宜之陝甘總督與土爾吉斯坦總督商定次序開辦陝甘總督奉到

批准條約將通行之事派委委員前往塔什干城知照土爾吉斯坦總督等因自係曾紀澤訂約時因左宗棠前以陝甘總督兼欽差大臣督辦新疆軍務故有此議_臣與護理陝甘督_臣楊昌濬緘商以現在局勢變遷未便拘泥條約而所派之員苟非諳練邊務轉恐僨事哈密距伊犁太遠_臣行營差遣各員求其熟悉伊犁等處情形者一時殊難其選應即由金順會商錫綸升泰就近派委委員前往以期便捷而資得力所有接收伊犁及分界諸事宜現籌辦理情形謹恭摺具陳是否有當伏乞

聖鑒訓示施行

光緒七年閏七月初二日

軍機大臣奉

旨覽奏均悉官軍進紮伊犁自應嚴禁擾累善爲撫輯將來善後諸事著劉錦棠隨時與金順會商辦理前已派金順督辦交收伊犁事宜錫綸作爲特派大臣該卿當仍遵前旨與該將軍等妥商籌辦欽此

科布多所屬布倫托海無庸撥營駐紮片

竊科布多參贊大臣

臣

清安等曾於上年咨請大學士前任陝甘

督

臣

左宗棠撥軍駐紮布倫托海地方以固邊圉左宗棠意以調

營前往則糧餉軍裝等項必須源源接濟方能有恃無恐該處南距鎮迪道所屬之古城瑪納斯等處程途寫遠轉饋維艱且其時新疆諸軍正議添竄無力兼顧若僅撥一二營分駐又恐形單力薄不能禦敵多則轉運愈難是以左宗棠躊躇未卽撥營比經咨覆清安等令其與

臣悉心籌議嗣經清安等

奏明依照左宗棠覆文由 臣 妥籌辦理奉

旨恭錄咨會前來 臣 查科布多所屬之布倫托海地處極邊毗連俄境前值防務戒嚴自不能不籌兵設守現在和約已定邊防稍鬆今昔情形迥不相侔卽今投俄之哈薩克陝回各種或有零股出沒清安等所轄兵丁當足以資捕勦自可無庸再由 臣 軍撥營前往且新疆南北兩路各軍現以餉源日絀正在分別裁減歸併力圖撙節所存馬步各防營僅分布數亦實無餘力可以他及並非故存畛域之見也所有布倫托海地方現在無庸由 臣 撥營駐紮緣由謹附片具陳伏乞

聖鑒訓示

光緒七年四月初五日

俄國駐喀領事權飭局員兼顧片

竊 臣 接准幫辦軍務廣東陸路提 臣 張曜咨開俄國新設喀什噶爾領事官已於本年十月十九日抵喀所有中俄交涉公事應飭喀英善後局員兼辦遇有重大事件仍由局員稟商辦理等因咨

會前來查新約條載俄國領事官駐中國遇有公事與本城地方官往來均用公文兩國人民在中國貿易等事致生事端應由該領事官與地方官公同查辦等語惟南疆各城尙未設官中外互市交涉伊始經理需人該善後局員原管地方事務所有與俄國駐喀領事官一切交涉公事應權飭喀英善後局員就近兼顧以專責成遇有重大事件仍報由張曜督同辦理以昭妥慎俟將來官職設定另案

奏明辦理除咨覆外謹會同陝甘督譚鍾麟幫辦軍務張曜合詞附片具陳伏乞

聖鑒訓示

光緒七年十一月二十七日

請按約索還烏什之貢古魯克地方摺

竊新疆局勢自準部戡定回疆全入版圖闢山通道擇要安設卡倫臺站南北一氣貫注無事則換防徵調遵率自由有事則振旅饒軍進退如志

廟謨宏遠

睿慮精詳百世莫之或易也。查伊犁通南捷徑有四一自那喇特卡倫經朱勒都斯察罕通格兩山以達喀喇沙爾一由穆素爾達巴罕渡特克斯河踰冰嶺以達阿克蘇之札木臺一出伊克哈布哈克卡越貢古魯克達巴罕以達烏什一出鄂爾果珠勒卡倫踰善塔斯巴爾琿兩山渡納林河以達喀什噶爾然阿克蘇冰嶺台路艱阻萬狀夏月冰渙四山圻溢裂流峭壁森立莫能飛渡亂後台站盡替現僅阿屬七台經照舊安設餘已咨商伊犁將軍金順辦理尙未接准覆文其喀喇沙爾一路曠廢已屆百年其中陵谷變遷道路通塞水草有無均難懸揣疊經行查鮮據昨已函致金順請將山北情形確實查覆再議疏通其納林達道蚤非我有自可毋庸議及獨烏什之貢古魯克一路地界八城之中爲南北相通第一津要遠在界綫東南新舊條約

皇朝地輿圖志班班可考也。查中俄界約大率按山水分宗誠

以山峙水流古今莫易故界綫所至輒指定某山之頂或水流去向以定經界山陰屬俄山陽屬中水西流之處屬俄東流之處屬中天然界限朗若列眉而經緯方隅判然兩截雖地名沿革語言文字稱謂各殊百變不能離其宗矣謹按塔城舊約所載伊犁南界過那林哈勒噶由特穆爾圖淖爾南邊之罕騰格爾薩瓦巴齊貢古魯克喀克善等山統曰天山之頂行至葱嶺靠浩罕爲界是那林迤南約載之貢古魯克明明與罕騰格爾諸山連類而及且申言天山之頂其確指貢古魯克山頂而言非指烏什貢古魯克山麓爲言義至明也 前慮南路沿邊地界情形在事諸 或者難於洞悉特飭駐軍阿克蘇道員羅長祐將圖約所載地名異歧闕畧之處遵照指示詳查細繹齋由 覆加考覈函達金順與伊犁參贊 升泰所有查勘烏什西北之格根特克斯喀喇庫勒等處由俄境通伊大小路徑遠近險易條分縷晰悉以相告本年夏間巴里坤領隊 沙克都林札布奉

旨勘分南界臣復飭羅長祐將原查情形就近詳告沙克都林札

布用備採撫嗣據烏什善後局員知縣周應棻申報本年八月十

三日沙克都林札布帶同俄使自阿克蘇行抵烏什由貢古魯克

雅滿素各卡倫繞貢古魯克山麓至別疊里達坂共立界牌二處

俄使各埋銅牌一面所過山峽卡隘城堡逐一繪圖並將烏什城

垣丈量規計繞出布魯特牧場周迴游歷延展四十餘日至九月

二十六日始出烏境時幫辦軍務張曜已先期出卡守候日久

咨報前因請由臣理論行催比經咨行查照旋准張曜咨初接沙

克都林札布函會從那林哈勒噶起程度冰嶺由阿克蘇烏什先

勘北界十月初六日沙克都林札布同俄使密登斯開行抵喀什

噶爾詢知阿烏邊界從罕騰格里至別疊里山已立界牌其奇恰

爾達坂迤西現已積雪難行擬俟來年五月再行勘辦並准鈔錄

喀什噶爾互換界約函寄到臣逐細覈閱如第一條由那林哈勒

噶河起過穆匝爾特達坂向西天山中梁罕騰格爾頂上接薩瓦

巴齊又從薩瓦巴齊山口卡子以至貢古魯克山口繞至天山均因達坂高險人難越過通指天山中梁爲界天山東南屬中西北屬俄凡天山斷處向西北流河水不許改截源流等語尙與塔城舊約相符該俄使似亦知約不可背者何以貢古魯克山口至別疊里之達坂路兩邊相離二十二丈半又復埋立中俄兩國界牌鄂博耶所稱別疊里卽畢底爾向西北流河水當卽阿克蘇上流之畢底爾河山口達坂路當卽烏什出貢古魯克卡以達伊犁之路也 維天山南北分支千條萬派隆崇綿亙每山中峯以至山麓蟠屈引伸百里一小曲千里一曲一直矣故按北山言之由東而西起巴里坤之松山以至那林河源凡數千里統以騰格里指名中峯由南而北自阿克蘇以至伊犁千二百餘里總以冰嶺達坂爲中峯中峯既定然後分疆畫界可得而言也以故塔城舊約雖詳於北而略於南然其第三條結束特指明罕騰格里薩瓦巴齊貢古魯克喀克善等山統曰天山之頂一語由辭譯義匪特罕

騰格里確指天山中幹之頂爲界卽貢古魯克喀克善各支山罔
非各指天山頂爲界也騎嶺分界則烏什邊外俄界應在貢古魯
克諸山之陰不得侵入山陽中國境地也今其所換界約凡貢古
魯克以上各山通指天山中梁爲界乃復於貢古魯克山口及別
疊里之達坂路兩邊相離二十二丈半埋立中俄兩國界牌鄂博
侵佔至畢底爾河源且將烏什城垣丈量就其約章按其舉動實
屬支離刺謬自相矛盾居心叵測已可概見失今不言後將指此
次會勘新界爲定界甚且於俄界之外中界以內駐兵設卡任意
作難忍之則有積薪厝火之憂發之又冇投鼠忌器之慮如北路
哈巴河故事有明徵也迄今科界黃綫迤西蒙民暨哈薩克三萬
餘衆撫綏安插重煩

宸厪將來作何了局尙難懸擬若貢古魯克至別疊里山南達坂
路所立俄界兩處不趁晝分未定按約索還則現隸烏什之奇里
克胡什齊兩布魯特部落勢必自撤藩籬終歸俄有而貢古魯克

通伊犁捷徑非我所能問津南北隔絕卽八城東西中間亦多梗阻伊犁勢成孤注特克斯川雖得亦猶之未得矣微論有事徵兵饋餉窒礙不行卽平時之文報往來必須繞越隔閼孰甚焉夫以中國固有之地照約載地界畫畀俄人我爲主而彼爲客如其違約越佔曲在彼而直在我我自得以有辭如哈密幫辦長順深明此義以故勘分中界有得無失且將紅綫迤西之格登別珍烏諸山爭爲我有抑其詭謀驕氣彼終讐服無詞辦理洵爲得手嚮使勘分伊犁南界守轍循途亦卽免此周折矣。伏讀本年八月初三日

諭旨西北邊界條約所指地名必須查考確實方免混淆稍有遷就出入甚大務當詳慎妥辦不得稍涉大意又讀九月二十四日上諭新約卽定惟有就原圖應行勘分之處力與指辯酌定新界勿稍遷就各等諭

聖訓煌煌無微弗燭南路事同一律自應恪遵辦理擬請飭下總

理各國事務衙門向俄國駐京公使據理按約與之辯論所有伊犁南界應照此次中界所定格登山紅綫循格根河順喀什噶爾西邊行至葱嶺靠浩罕界爲界中間應行勘分之處支節繁多務須責成分界大臣恪遵

諭旨力與指辯酌定新界勿稍遷就然後由烏什貢古魯克出卡以達伊犁之路足可索還事後不至別生梗阻所立貢古魯克及別疊里達坂路兩處界牌應一律拔除凡新約越佔之處悉予更正庶足清淆混而杜覬覦並懇

天恩諭令曾紀澤與俄國原派全權大臣原始要終以重邦交而清邊界必期兩昭明信而後已臣明知新疆界務各有專責何敢故越尊俎然烏什貢古魯克地方被俄人影射越佔奪我南北要津關係重大臣忝膺重寄未報涓埃僞事關全疆利害知而不言縱邀

寬大殊施而捫心何以自問區區之愚實匪有他所有烏什之資

古魯克地方關緊要擬趁畫分未定請

旨索還以通南北而利邊防各緣由謹會同幫辦軍務張曜據實具奏愚昧之見是否有當伏乞

聖鑒訓示施行

光緒七年十二月十八日

俄商往來新疆貿易不得行銷中國土貨摺

竊臣前准總理各國事務衙門遞到中俄和約當經分別咨行遵辦在案近准伊犁將軍金順咨稱現議交收伊犁俟收城之後劃界通商當次第舉行等語大凡商務所關固應早爲議定各自通飭諭知俾兩國皆有遵守一經開辦庶幾免觸禁令弭釁端卽以固和好是亦重邦交之道也維新疆各城久已設局抽收稅釐商貨出入必須查驗始准銷售今俄商運貨進卡如至新疆有稅釐局地方自應呈請查驗於貨單貨包上蓋用查過戳記方可行銷如未銷完運赴別處亦應將銷過貨物開註單內呈局查明蓋戳放行續至有稅釐局之處均應照此辦理儻貨照不符卽送

交俄官區處以杜包庇販運情弊約章載有專條在中國順事就施不過畧增繁費而俄人甫經入市詎能盡悉約章若待臨時分辯易起爭執不如由俄官早自傳聞務使成範各懷迨至進卡卽踵而行之以是爲固然而無所遲阻於行商豈不甚善條約又載俄商辦運中國土貨由哈克圖及新疆回國特將回國二字標明則在中國途間只當逐細查驗以防夾帶私貨原無准其銷售之理就令已運出卡亦不得由陸路復運進卡詳考舊章有由海口辦運中國土貨復運內地銷售之說而無自俄販運中國土貨由陸路復進口內銷賣明文凡新約所未改者皆可仍舊照行而俄國邊界商民皆不知此往往將中國土貨復運進口雖經在事各員頻令折回似仍於義未曉此事於華商大有關礙所以然者華商完釐次數多而成本重俄商完釐次數少而成本輕故未可任其運銷恐妨華商生計耳俄官應將和約宣告該國官商於辦貨時加意斟酌遇有此等土貨幸勿錯誤再行購買販運前來則可

免其阻滯折耗爲益實不少也合無仰懇

飭下總理各國事務衙門照會俄國駐京使臣移知該國官員一律照辦以符約章而保商本謹恭摺具陳伏乞

聖鑒訓示施行

光緒八年正月十五日

規畫新疆郡縣摺

竊臣等承准軍機大臣字寄光緒八年三月十七日奉

上諭譚鍾麟奏籌度新疆南路情形一摺所請酌度七城廣狹繁簡設立丞倅牧令一員更於喀什噶爾阿克蘇兩處各設巡道一員如鎮迪道之例着劉錦棠體察情形會商該督妥議具奏等因欽此仰見

朝廷眷顧西陲動規久遠之至意跪聆之餘莫名欽感伏念新疆當久亂積罷之後今昔情形判若霄壤所有邊疆一切事宜無論拘泥成法於時勢多不相宜且承平年間舊制亂後蕩然無存萬難再圖規復欲爲一勞永逸之計固舍增設郡縣別無良策種種

情由經大學士前任陝甘督臣左宗棠迭次奏明有案仰蒙

聖明洞鑒准其因時制宜在事諸臣先後稟承

宸謨籌辦善後諸務罔敢稍涉疏懈現在地利日闢戶口日增各族漸知向化諸事均有成效郡縣之設時不可失茲承

旨命臣等會商妥議久安長治之基實肇於此自當就愚慮所及熟籌審度以期妥協而垂永久謹按經野建官之道必量其地之民力物產足以完納國課又可供給官吏胥役有餘然後視其形勢之衝僻繁簡設官以治之非從寬以爲計畫則官困而民必受其害故新疆添置郡縣設官未可過多此必然之勢也惟南路各城人民較多腴區較廣其轄境之最遼濶者縱橫至數千里少亦數百里若設官太少又慮鞭長莫及難資治理臣鍾麟原奏內有一城不過數十莊不及東南一小縣七城各設一官足矣等語經臣錦棠就近體察情形此說蓋亦不盡然又臣鍾麟原奏將吐魯番作爲南路城池因有七城設官之議臣錦棠查吐魯番現不在


八城數內自吐城以西喀喇沙爾庫車阿克蘇烏什是爲南路東
四城葉爾羌喀什噶爾英吉沙爾和闐是爲南路西四城應統八
城通盤籌畫一律改設郡縣以上各節均經 錦棠 鍾麟往復
函商意見相合公同酌議除自哈密南至吐魯番北至精河應暫
照 鍾麟原奏無須另設多員外回疆東四城擬設巡道一員駐
紮阿克蘇該道以守兼巡爲兵備道督飭所屬水利屯墾錢穀刑
名事件撫馭蒙部彈壓布魯特稽查卡倫作爲衝煩疲三項要缺
喀喇沙爾土爾扈特和碩特游牧地方犬牙相錯每有交涉事件
擬設直隸廳理事撫民同知一員治喀喇沙爾城庫車擬設直隸
廳撫民同知一員治庫車城阿克蘇爲古溫宿國擬設溫宿直隸
州知州一員治阿克蘇城拜城縣知縣一員治拜城歸溫宿直隸
州管轄烏什緊鄰布魯特部落爲極邊衝要擬設直隸廳撫彝同
知一員治烏什城以上各廳州縣應統歸東四城巡道管轄同疆
西四城擬設巡道一員駐紮喀什噶爾回城該道以守兼巡爲兵

備道管理通商事宜督飭所屬水利屯墾錢穀刑名諸務彈壓布魯特稽查卡倫作爲衝煩疲難請

旨最要缺喀什噶爾爲古疏勒國擬設疏勒直隸州知州一員治漢城疏附縣知縣一員治回城歸疏勒直隸州管轄英吉沙爾緊鄰布魯特爲極邊衝要情形與烏什略同擬設直隸廳撫彝同知一員治英吉沙爾城葉爾羌爲古莎車國擬設莎車直隸州知州一員治漢城葉城縣知縣一員治回城歸莎車直隸州管轄葉爾羌所屬瑪喇巴什一城爲回疆東西咽喉要地積年河水爲患必須置員撫治擬設直隸廳水利撫民通判一員治瑪喇巴什城和闐爲古于闐國擬設直隸州知州一員治和闐城于闐縣知縣一員治哈拉喀什地方歸和闐直隸州管轄以上各廳州縣應統歸西四城巡道管轄凡茲建置大畧較之光緒六年四月十八日左宗棠奏擬設立各官稍爲簡省較之鍾麟原奏七城各設一官之議畧爲加增斟酌損益務適於中兼免流弊而成永圖至於佐

雜人員應俟郡縣設定由道員暨各丞倅牧令就近察酌地方情形將其必不可少者詳請奏設其各廳州縣疆界應俟立官畫分後再行奏咨各處地方暫時責成諸軍都統領管官督率營勇駐防俟兵制議定再行奏請設立總兵副將叅游都守千把等官其餘未盡事宜統候陸續籌議隨時奏請

睿裁所有擬設南路郡縣大概情形恭摺覆陳是否有當伏祈聖鑒訓示施行



新疆圖志卷九十九

奏議九

編例 劉錦棠二

請以新疆併歸甘肅疏

請將鎮迪二屬歲科兩考改歸撫臣辦理摺

請 賞坎巨提頭目翎頂片

新省添設稅務局試辦情形摺

新疆暫難規復制錢摺

查明新疆現辦稅務情形摺

會奏請頒巴里坤城各廟祠匾額城隍封號摺

庫車回子阿美提襲爵摺

委員試署准設新疆南路道廳州縣各官並籌現辦情形摺

請獎叙興築烏垣城工片

請給南北兩路官員辦公津貼摺

請以新疆併歸甘肅疏

竊查光緒六年大學士前陝甘督臣左宗棠奏稱將來議設行省必以哈密劃隸新疆形勢始合哈密及鎮迪一道所屬文武地方均應歸劉錦棠統轄所有升調補署考核及一切興革事宜均可就近辦理分別奏咨陝甘總督無庸兼管等因光緒六年十一月初四日奉

上諭左宗棠奏請將哈密鎮迪道歸劉錦棠統轄等語等因欽此欽遵在案伏念新疆改設行省之議左宗棠實始發之查本年三月十六日陝甘督臣譚鍾麟奏籌度新疆南路情形摺內亦有設立行省當從州縣辦起然後遞設督撫以統轄之等語蓋新疆本秦隴之屏障燕晉之藩籬亟宜經營盡善以固吾圉然舊制既不可復自不得不另籌善策左宗棠譚鍾麟所議改設行省固無非維持永久之謀至愚慮所及則與左宗棠等不能盡同有不容不及時陳明者自曩歲出關辦賊泊於今已歷七載熟度關外情形求所以長治久安之道固舍設郡縣易舊制別鮮良圖此

之所見與左宗棠等相同者也惟將新疆另爲一省則臣頗以爲不然現在臣等擬設之南路各廳州縣合之哈密及鎮迪道等處原有各廳州縣總共不過三十餘處卽將來地方日益富庶所增亦必無多卷查光緒六年四月十八日左宗棠覆陳新疆宜建行省開設郡縣摺內所載擬設及原有各屬廳州縣亦不過二三十處嘗考各省中郡縣之最少者莫如貴州廣西等處新疆則尙不能及其一半其難自成一省情形亦已明矣且新疆之與甘肅形同唇齒從前左宗棠以陝甘總督督辦新疆軍務凡籌兵籌餉以及製造轉運諸務皆以關內爲根本其勢順故其事易舉臣之才力資望萬不逮左宗棠而自受代以來兩年之間雖無功過足錄然未至僨事者皆賴譚鍾麟楊昌濬諠篤公忠力顧全局故能勉力支持向使甘省大吏稍存畛域之見則邊事已不堪問若將關內外劃爲兩省以三十餘州縣孤懸絕域其勢難以自存且後路轉餉製械諸務必將與甘肅分門別戶以清眉目所需經費較日

前必更浩煩其將何以爲繼故新疆甘肅勢難分爲兩省。所見與左宗棠等不同者此也又閱譚鍾麟原奏籌度新疆南路情形摺稿議將北路鎮迪等處暨擬設南路郡縣皆歸

欽差大臣統轄謹按

欽差大臣本非國家常設之官且哈密及鎮迪一道原係奉

旨暫歸統轄現既議設南路郡縣必須熟籌可久之道不得仍

作權宜之計以郡縣設定後諸事須照各省辦法而言例章則

營無舊案可稽言用人則軍中無合例堪以補署之員至於錢糧

刑名升遷調補諸事又無藩臬兩司可專責成似茲窒碍難行之

處未可枚舉之愚擬請將哈密鎮迪道等處暨議設南路各廳

州縣併歸甘肅爲一省惟歸甘督遙制竊恐鞭長莫及擬倣照江

蘇建置大畧添設甘肅巡撫一員駐紮烏魯木齊管轄哈密以西

南北兩路各道廳州縣並請

賞加兵部尙書銜俾得統轄全疆官兵督辦邊防並設甘肅關外

等處地方布政使一員隨巡撫駐紮舊有鎮迪道擬請援照福建臺灣之例

賞加按察使銜令其兼管全疆刑名驛傳事務改迪化直隸州知州爲迪化縣添設迪化府知府一員治迪化城管轄迪化昌吉綏來阜康奇臺五縣似此辦理實較另爲一省稍免煩費而於新疆時事亦甚相宜如蒙

聖明准行仰懇

迅簡巡撫藩司及擬設之南路兩道員以便及早措置豈是現在伊犁既經收還分界亦不久可以竣事沿邊無警防務能嚴如設巡撫則

欽差大臣儘可裁撤臣凝侯巡撫西來當舉關外一切情形詳細告之並將經手事件交其接辦再行呈繳關防仍俟臣足病醫治全愈後卽當束裝北上以伸累載戀

闕之忱蓋新疆蕩平經六年之久此時軍務日鬆急宜定大局以

修政理。於吏治嚮少閱歷關外郡縣諸事宜多係創始斷非軍旅粗材所能了局區區愚悃實恐貽誤將來並非意存規避此不能不預先瀝陳者也。為規畫久遠起見理合恭摺具陳是否有當伏乞

聖鑒訓示施行

再哈密以西各滿營旗丁亂後子遺僅存舊制萬難規復卽以古城烏魯木齊兩處言之前此古城領隊大臣勝安由京西來道出哈密與談及古城滿營房屋久已鞠為茂草該處旗丁總共不過十數人勝安自以補授斯缺原應卽行赴任究竟古城無隊可領無營署可住進退維谷殊形狼狽。比屬其與金順恭鐸熟商自處之道悵然踰天山北去。於光緒二年秋夏之交率師克復烏魯木齊其時滿城傾圮瓦礫荒涼未見旗丁一人嗣進克南路各城始將旗丁之被賊裹脅者陸續拔出咨送烏魯木齊安插然為數亦屬無多故以恭鐸之精明強幹世受

國恩銳意欲有所爲以圖報稱然所管旗丁只有此數雖都統有兼轄鎮迪道之責而政務亦甚簡少不足以發抒其才氣他如哈密辦事臣明春所部健銳威儀各營現已奏明全行裁撤其所轄回務亦經左宗棠奏准歸哈密通判管理欽遵在案竊謂國家建官分職原各有分內應辦之事現在新疆時事變遷都統暨辦事領隊各大臣兵少事簡幾無異投閑置散此不但非

朝廷設官之意亦諸臣心所不安也如蒙

聖明體察臣言准照擬設甘肅巡撫之議則烏魯木齊自須設立撫標官兵南北兩路均宜另設額兵添置總兵副將參遊都守千把等官以爲永遠防邊之計烏魯木齊提督應移駐喀什噶爾城以扼要害吐魯番暨南路舊有參贊辦事領隊各大臣員缺固可一律裁去卽自哈密北至伊犁所有都統暨辦事領隊各大臣員缺亦宜酌量裁撤巴里坤古城烏魯木齊庫爾喀喇烏蘇等處所餘旗丁如目前之零星分布終恐無濟實用不如併歸伊犁滿營

生聚教訓以期漸成勁旅查承平時新疆南北兩路係歸伊犁將軍總統烏魯木齊都統亦兼轄鎮迪一道如設巡撫不但鎮迪道無須都統兼轄卽將軍亦無庸總統全疆免致政出多門巡撫事權不一其伊犁滿營似應改照各省駐防將軍管制從新整頓務求精實可用庶於邊防有所裨益總之新疆不復舊制便當概照行省辦法若二者並行則一切夾雜牽混之弊難以枚舉屬茲伊犁已還界務將竣大局急宜定奪

臣恭綰

欽符既有所見不能不據實直陳是否可行祗候

睿斷理合附片陳明伏乞

聖鑒訓示施行

請將鎮迪二屬歲科兩考改歸撫臣辦理摺

竊^臣等准禮部咨關外鎮迪二屬生童向由烏魯木齊都統代爲局試現在都統已經奏撤自應改歸巡撫衙門辦理惟甘肅自光緒元年奏准添設學政與從前陝甘學政兼考兩省不同所有鎮

迪二屬考試事宜或仿照都統局試舊章由巡撫嚴行局試抑或
卽由該學政按臨烏魯木齊專棚考試應會同體察情形奏明辦
理等因_臣等竊惟新疆南路新設各廳州縣初令繙童入塾誦習
經書均尙未能設學北路鎮迪二屬自乾隆年間議定學額向由
學臣於按臨肅州以前將考生童題目封固豫行密送都統局試
仍將試卷封固移送學臣按額取進三年一次科歲並行歷經辦
理在案現雖改設行省而各該屬生童應試爲數無多仍未便專
棚考試_且道途遙遠往返需時學臣按額取進三年一次科歲並
行歷經辦理在案現雖改設行省而各該屬生童應試爲數無多
仍未便照內地考試章程奏明辦理惟現在烏魯木齊都統旣經
奉

旨裁撤各該屬生童自應改歸撫臣局試_臣等往復咨商意見相
合擬請嗣後迪化各屬及鎮西廳屬生童每屆考試卽由學臣於
按試肅州之前豫將題目密送撫臣仿照都統局試舊章辦理是

否有當謹合詞恭摺具

奏伏乞

聖鑒訓示施行

請 賞坎巨提頭目翎頂片

竊 准署烏魯木齊提督 譚上連會同喀什噶爾道員黃光達
咨稱色勒庫爾之南回部坎巨提頭目賽必得咬里罕專差解貢
來喀以該頭目初充部長人心恐有未孚請派弁赴查以安民心
當經揀派布魯特回目庫爾班前往該部傳示並察看情形去後
據庫爾班回稱該處民情安靜惟頭目自以未有職銜不足以孚
衆望並由該部頭目稟同前情呈請核示前來 查該部落當回
疆變亂之時頭目額則項以葛爾微區不敢從逆憑險自守歸然
獨存南疆克復以來旋即遣人進貢沙金詞意懇至實屬深明大
義當經 咨由前大學士陝甘總督 左宗棠奏明有案現查該
回部頻年貢獻殫竭惻忱遇各外部偶有不靖隨即專差稟報此

次該頭目初領部衆又復稟請查看洵屬恭順可嘉合無仰懇
天恩俯准賞給該頭目花翎四品頂戴以示懷柔而昭激勸
撫綏外部起見是否有當謹據情附奏伏乞

聖鑒訓示施行

新省添設稅務局試辦情形摺

竊維新疆防營歲餉向賴各省關協濟而設省以來地方應辦事
宜需用浩繁每歲就地籌款所入無多不敷尙鉅前准部咨議籌
封儲之款此時雖未遑計及而每歲不敷既鉅仍不能不就地力
籌期其少有裨益 前於光緒十一年委員於哈密古城兩處設
局抽收百貨入稅又委員於南路各城會同地方官查明出產貨
物酌令照章收納稅課曾於籌辦開源節流二十四條案內將辦
理情形

奏明在案兩年以來哈密古城兩局每歲收銀二萬餘兩南路各
城土產貨稅亦屬寥寥推原其故實緣地方寥闊奸商繞越偷漏

在所不免卽如哈密一局專收東路貨稅古城一局專收北路貨稅而西南兩路出入貨稅獨未開辦無論稽查難周亦不足以昭平允現在省城商賈漸集自應照章抽收貨稅以歸一律當飭在省城設立稅務總局委員試辦兼以稽核哈密古城各局報銷事宜並於西路之綏來南路之吐魯番廳各設分局抽收西路貨稅兼事稽查以免偷漏庶於通省稅務可期漸有起色抑更有請者新疆開辦土稅以來俄國商民藉有暫不納稅之條一切土貨牲畜任意販買每有俄商入境勾引中國商民百計譟張肆行包庇或將原領舊票賣於商民或引商民車輛同行希圖蒙混一經分局查明照章收稅俄商卽稱不守條約捏報俄官紛紛照會查辦其爲洋貨猶可甚至土貨亦然其爲真正俄商猶可甚至久在新疆居住之安集延哈薩克亦然眞僞混淆巧詐百出所以銷貨多而收稅少也查中俄改定條約准俄民在關外天山南北各城貿易暫不納稅俟將來商務暢旺由兩國議定稅則卽將免稅之

例廢棄等語屈指訂約已屆七年俄商之運貨出入者喀什噶爾道屬每年估計成本銀約百二十萬兩阿克蘇道屬亦不下十餘萬兩其由伊塔入中者尙不在此數新疆地方瘠苦銷貨無多似此卽爲暢旺若不乘此議定俄商稅則一律抽收竊恐俄商日逞其阻撓之心而小民之生計因之日削是不獨包攬土稅爲可慮也且一經明定稅則彼此遵行獎資卽除爭端亦泯尤足以安邊息事實於地方有益如蒙

俞允應請

旨飭下總理各國事務衙門照會俄國駐京公使議定稅則分飭遵辦庶商民無所藉口而稅課亦昭平允矣據藩司魏光燾詳請奏咨前來臣覆查無異當飭該司等先將土稅妥爲籌辦總期於公家有益而下亦不致病民除一應開支局費章程與開辦洋稅設立邊關各程式俟奉到

俞旨再行詳奏外所有新疆設立稅務總分各局暨擬請議辦洋

稅各緣由謹會同陝甘總督譚鍾麟恭摺具陳伏乞

聖鑒訓示施行

新疆暫難規復制錢摺

竊前准部咨本年正月間欽奉

皇太后懿旨醇親王奕訢等奏會議整頓錢法一摺規復制錢必應廣鑄鼓鑄福建所鑄分量稍輕嗣後每錢一文均以重一錢爲率京局及各省一律照辦等因欽此前已恭錄飛咨在案現在各直省停鑄已久應再飛咨甘肅新疆巡撫嚴飭藩司籌款辦銅加卯鼓鑄除搭放行用外餘備酌提等因咨行到當經轉行遵辦去後茲據藩司魏光燾詳稱遵查新疆北路向用制錢南路向用紅錢承平時制錢於伊犁設寶伊局鼓鑄紅錢於阿克蘇設局就溫宿拜城庫車三屬額銅鼓鑄其錢沿纏俗普爾式樣枚重一錢三分以一文當制錢之四以五百文爲一掛合銀一兩自阿古柏竊踞南八城創鑄天罡形圓如餅中無方孔每圓五分沿用既久

成色分量任意低減流弊滋多光緒六年前陝甘督。左宗棠奏請改鑄銀錢每圓一錢製造新式銅模較準一律交前幫辦軍務陞任山東撫。張曜設局辦試以防作偽因工多費鉅旋復停止北路制錢亦爲入關商民攜帶略盡市肆遂通用天罡南路仍天罡紅錢並用十一年因各屬完納額銅民多不便改徵糧石阿克蘇局需用之銅遂招民承採由官價購然小民類多窮苦必須公家先給成本嗣擬廣鑄紅錢爲禁革天罡地步復於北路南山試挖銅鑛就省鼓鑄而以庫車銅益之南路則以拜城等處之銅專供阿克蘇局無如產銅之區多係童山且隔民居動輒數站負糧運炭咸苦遠涉北路人烟稀少工價更昂銅數不旺以故南山銅勛歲不滿萬溫宿拜城庫車三屬合計亦不過五萬餘勛工匠技藝未嫻每工日祇紅錢一掛而北路多寒南路多熱每年又需停工三五月不等以銅炭價值折耗薪工等項通盤核計阿克蘇局之錢每掛需本銀九錢五六分以錢一掛易銀一兩尙屬有贏省

城則需本銀一兩九分有零不無賠貼若鑄制錢按新疆從前市價二千文易銀一兩賠貼將及三倍時地所限萬難如內地籌辦之易請俟礦務暢旺經費漸減再行改鑄制錢等情詳請具奏前來_臣維規復制錢必廣籌鼓鑄欲籌鼓鑄必先辦銅觔如福建等省鼓鑄之銅或取資鄰省或轉購外洋新疆僻在西陲水道不通礙難照辦而紅錢五百文計重四觔一兩制錢一千文計重六觔四兩以錢合銀紅錢五百易銀一兩制錢二千文易銀一兩兩相比較制錢費銅多至兩倍有奇改鑄制錢勢必益形竭蹶合無仰懇

天恩俯念新疆銅礦不旺暫難規復制錢准用沿鑄紅錢照章行使一俟工商輻輳物價日平銅觔足供鼓鑄徐圖改造制錢以歸畫一出白

聖裁除伊犁原設寶伊局能否照舊辦理應由署伊犁將軍_臣錫綸就近查明奏辦外謹會同陝甘總督_臣譚鍾麟恭摺具陳是否

有當伏乞

聖鑒訓示

查明新疆現辦稅務情形摺

竊。上年具奏新疆添設稅務總分各局並請辦洋稅一摺旋准部咨所徵貨稅是否往來商稅抑係落地稅稅則按值百抽稅若干局費應需若干應俟詳細奏明再行核辦等因。查光緒十一年新設東路哈密北路古城兩局均徵百貨入稅一稅之後不復重收上年春間復於西路綏來縣南路吐魯番廳添設分局以收兼查並於省城設立總局徵收落稅以歸畫一大率新疆貨物自東北兩路來者皆陝甘山西歸化包頭等處商民販運內地各貨爲數較少自西南兩路來者係本地漢回纏商販運一切土貨爲數較多現定稅則均值百兩稅銀三兩較值百抽五之例量爲核減所需局費查內地抽釐章程准按一成支銷新疆百物騰昂創辦艱苦行令實支實銷但不得逾二成之數至稱所稅貨物係土

人所販土貨抑土人所販洋貨或俄人所販土貨等語查洋稅未定先收土稅俄商包庇勢所不免已於前奏陳明在案惟現在不能因未辦洋稅並廢土稅亦未便獨抽土稅遂棄洋稅設法補救惟有收華商洋貨稅於入境落地之時俄商洋貨稅於轉售華商之後華商土貨稅收於販戶俄商土貨稅收於賣主徵商人之稅而不經俄商之手彼卽無從置喙辦理亦覺持平然此究屬一時權宜若於稅務暢興仍非開辦洋稅不可據該總局司道查明詳請

奏咨前來¹²覆核無異除洋貨一節仍俟總理衙門核覆再行辦理外所有查明新疆現辦稅務情形謹恭摺馳陳伏乞聖鑒訓示飭部查核施行

請頒巴里坤城各廟祠匾額城隍封號摺

竊據甘肅鎮迪道福裕詳稱據署鎮西撫民同知陳晉蕃轉據地方紳士前任巴里坤鎮標中營游擊陳升恒補用游擊李鳳鳴升

用直隸州知州袁永豐並耆民人等聯名呈稱巴里坤北門外歷有

關聖帝君廟建自唐時雍正年間建城設官改爲

武聖廟神靈最著又南關歷建有蒲類海

龍神祠暨

楊泗將軍祠並

城隍廟戶民因事祈禱輒著靈應同治三四年回氛甚熾斗粟萬錢烏垣奇古吐哈各城相繼不守糧盡援絕城關人民相食四鄉村堡焚掠一空逆回喉黨時撲孤城當攻守喫緊時在城官紳兵民等遂向

關帝諸神廟禱求默佑旋督同飢疲之官兵團丁登陴防守隨賊所向拚死捍禦屢瀕於危賊均敗退夜間巡邏將士時見神異或如兵馬馳驟之聲或見衣甲舞刀挺立城上四年六月初九日賊由東北城隅架雲梯猱升而上前隊業已登城突遇神將擋禦賊

衆驚譁我軍士遂當先轟擊賊卒以退鎮城亦因之而安向非

武聖各廟神靈護佑人力何能逮此伏查鎮西地方守城換防將
卒團紳民勇生者仰蒙

皇恩獎叙死者亦荷

賞卹入祠獨

神庥未答紳民等撫衷負歉感悚交深是以合詞呈懇轉詳

奏請分別

賞頒匾額並

賜封號等情前來等維新疆自逆回變亂南北各城均已次第
淪陷惟巴里坤孤城懸注糧盡援絕當時官軍尙能一意拒守力
保危城爲後此規復新疆駐軍儲糧根本雖殺賊致果必賴各將
士團丁忠勇之力而

神靈默佑護

國保民其功德未可泯也茲據鎮迪道福裕具詳轉懇前來等

覆查無異合無籲懇

天恩頒發巴里坤

武聖廟蒲類海

龍神祠

楊四將軍廟匾額各一方並

賞賜巴里坤

城隍廟

封號用昭靈貺而順輿情再巴里坤城隍向無

封號又此摺係錦棠主稿合併陳明

內閣奉

上諭劉錦棠等奏神靈顯應應請頒匾額並加封號一摺甘肅巴

里坤

武聖廟

龍神祠

楊泗將軍廟

城隍廟素著靈應同治年間回匪屢次撲城勢甚危急經官紳等虔謁祈禱均獲轉危爲安實深寅感著南書房翰林恭書匾額一方交劉錦棠祇領敬謹懸掛巴里坤

武聖廟

龍神祠

楊泗將軍廟以答

神庥所請加

城隍廟封號之處著禮部議奏欽此

庫車回子阿美提襲爵摺

竊臣前於光緒四年在喀什噶爾行營採訪回疆西四城歷年殉難滿漢文武官員及各阿奇木伯克銜名事實據署喀什噶爾三品阿奇木伯克阿美提稟稱該伯克祖父向居庫車其父愛瑪特係頭等台吉曾襲郡王世職充阿克蘇三品阿奇木伯克同治三

年五月初一日庫車漢回作亂該伯克之父愛瑪特在城爲賊所執監禁三日旋被戕害等情當經 咨明大學士前陝甘督 左宗棠具奏請卹嗣准理藩院議奏奉

旨賞給卹銀一千一百兩等因欽此欽遵在案茲准幫辦軍務廣東陸路提 張曜咨據喀英善後總局取具已故回子郡王愛瑪特之子阿美提年貌籍貫冊結並宗圖親供甘結蓋印呈請轉咨可否請襲世爵等因到營 查庫車回子郡王自鄂斯滿肇封三傳至愛瑪特同治三年因逆回變亂庫車城陷爲賊所執不屈而死洵屬大節無虧其子阿美提例得承襲郡王世爵 前飭令署理喀什噶爾阿奇木事務爲人尙屬謹慎現又調署和闐三品阿奇木伯克於應辦諸事頗稱認真茲准咨請核明具

奏前來除將咨到宗圖親供冊結各件一併咨院查照外相應請旨飭下理藩院議覆遵行再愛瑪特請卹案內因左宗棠原奏誤作愛買提經理藩院議覆行查嗣查該故回王名字實係愛瑪特

咨院更正有案合併陳明伏祈

聖鑒訓示

委員試署准設新疆南路道廳州縣各官並籌現辦情形摺

竊。錦棠承准吏部咨會遵

旨會議_臣等前請變通新疆官制管制具陳一摺奉

旨依議欽此黏連原奏知照到管當卽欽遵分咨關外在事諸_臣

並飭現辦善後局員各將所管地段界址暨一切情形詳悉察奪具報去後伏維體國經野通籌局勢須原始以要終庶可大而可久特當創辦之初有因一處之妨而致疑全局之多礙有因一端之阻而動謂衆務之未宜風氣之所浸漬成例之所拘迫欲變之於一旦微論法制尙未詳訂急切靡所適從卽使綱舉目張自謂燦然大備且有箕風畢雨之好足以淆我視聽擾我神明種落之殊教令之別非獨其地有以限之抑由其俗積漸使然也關隴爲天下之屏蔽而塞外又踞關隴之上游山水之所從出其地則高

寒而多沙磧其人雖渾樸而不聯屬不問向之居國行國究其居處服食文字語言迥異中土漢唐以來殷憂西事罔不經營捍禦聊固吾圉蓋既爲形勢所必爭則卽爲聲教所必及乃以一其習尙無復他虞夫因創之所乘實由天時人事之所湊拍曩者漢置河西四郡當時雖不免耗中事西之苦而至今賴之西域自古騷縻之地往往一隅蠢動腹地爲震自

祖宗朝櫛風沐雨先後勘定南北兩路或分置屯防或開設郡縣星羅碁布遠近相維南疆地雖饒沃而因俗類獠犵難驟繩以禮法於是分

命大臣督率文武員弁兵丁鎮駐扼要之區彈壓巡緝差徭賦稅量爲征收舉凡疏節閭日用壯厥聲靈堅其趨向以待我

皇上今日因時制宜變通盡利。錦棠適躬逢其盛前陳應設應裁應改應移諸端仰荷

睿衡飭部會議茲各部院議覆摺內於議設者如置巡撫布政使

及鎮迪道加按察使銜管理刑名改迪化州爲縣設迪化府各節暫從緩議而議裁議改議移者如裁各城都統叅贊辦事領隊各大臣應俟南八城建置事宜辦有成效奉

旨准設巡撫再行會奏請

旨又裁去回官阿奇木伯克等另行酌設頭目則以均有職掌責任應更體察妥議章程核辦改設額兵將烏魯木齊提督移駐喀什噶爾亦令俟後請

旨回童現人義塾讀書有能誦習一經熟悉華語者咨部給予生監頂戴議以向無成案擬請俟回童粗通文藝時酌設學額憑文取進如以該回童等但須讀書認字不必責其文理應另酌給獎勵請

旨遵行至請南路改設道廳州縣各官均經先行議准令將應辦事宜會商妥協次第奏明辦理各等因詳繹部院諸議覆各條其餘應准應緩之事體無不斟酌至當上慰

宸衷誠以損益之舉動關久遠之規縱使疑無可疑猶當慎之又慎然創制早開乎其先則變通宜善乎其後從前滇黔之改流官近如臺灣奉天吉林之添郡縣皆時會之所趨

聖化翔治幾若行乎其所不得不行回童如能熟誦儒書諳習華語日久漸摩帖然就範既已革其舊習自當被以政教故應裁應改應移者刻下既須籌擬一則一氣相承因勢利導可收及時整飭之功一則經費宜定合計從長可免異日虛糜之弊部臣深知其然而現未卽請

旨飭辦者應俟准設之官具有規模然後分別舉行蓋卽臣鍾麟所擬設立行省當從州縣辦起之意自准部覆卽經往返函商熟籌辦法擬卽由臣錦棠就近先行委員往署詳察東西兩道應分之界限並各直隸州與其轄縣應分之村境各處城垣多未完固尙有應行改建增修之城各官衙署能否各就善後辦公局屋改作或應別籌營造壇廟倉廩監獄亦應擇要修建驛傳塘站視其

衝僻安設文員雜職置輔分司現除敕職緩議外其各廳州縣之
照磨吏目典史應與印官同城佐理此外各屬轄境遼闊應添州
同通判縣丞巡檢分防各按所屬繁簡酌添以便控制凡此要圖
務爲先正其名而後能責其事否則委員以空名理實政既無職
守亦無考成難期與斯民相維繫誠有如鍾麟所云者錦棠
擬遵部議就差遣各員內分委道員同知直隸州知州通判知縣
各官前往署理暫刊木質關防鈐記給令啟用俾昭信守惟是設
官之後文移征收詞訟宜照官署之式南路向無漢民鎮迪所屬
自經兵燹書吏更少於前無可調派前經分飭甘肅各府州於縣
所屬書吏中揀公事諳練者各派數名優給川資令其攜眷西來
備日後之分撥回官三四品阿奇木伊什罕伯克階職較崇前
慮其權重擾累曾請裁去銜額實欲杜漸防微而相沿已久未可
驟加屈抑擬請仍留頂戴略如各省州縣之待所轄紳士假以禮
貌使有別於齊民昔之衆伯克等分理糧役訟獄諸務將來擬分

擬爲吏戶禮兵刑工各書役與漢書胥雜處互授漢回文言期於相觀而善既可收其把持之權又可藉爲公家之用似屬兩有裨益俟印官履任後徐爲圖之如能行之有濟屆時另行

奏報各官每年應支廉俸公費銀兩已經部議照鎮迪道所屬數目支領所有應設書辦及各項人役名數月支工食銀兩勦飭數目亦應請照鎮迪道所屬定章支發以歸一律兩道綜司各屬政務須有通曉各項文字之人以備繙譯應請各添清字回文書辦各數名各屬傳訊訟案勘劃經界必先通其語言乃能從而剖斷應請各添回書通事數名以上月支工食銀兩勦飭數目均請照鎮迪道所屬書吏章程開支道員以下各官印信應懇

飭部按照擬就各項缺銜鑄造頒行查吐魯番同知之印文係兼用清漢回字此項印信似應一體兼鑄回文併懇飭下妥議定鑄南疆此次設官事屬創始當就練習邊情之員先將應辦豈是趕緊興辦方足以資治理現准先設各官願懇

天恩准照吉林新設民官各缺成案統歸因地擇人由外揀補一次則相從邊塞者知所奮勉吏治可期起色至於城垣衙署倉廩監禁應修各工舉不容緩南路土性鬆浮多曠卽燒成之甎塊曾不數年多被潮鹹剝蝕牆垣基身務較寬厚始可耐久已飭湘楚各軍選派勇丁趕將城工挑築並商幫辦軍務。張曜飭令嵩武軍營勇擇要興修許以事竣懇

恩擇尤獎勵均極踴躍用命第計工程浩大仍須兼僱縷回乃能期其成功其須用之鐵木器及各項工匠器物防營之不能辦者令各委員核實動用再懇

飭撥的款以濟要工值此經費支絀之際。等受

恩深重尤當格外撙節無如地處邊荒工係創建但期力杜浮冒未能牽合成規合無仰懇

聖慈俯准俟後歲役除繪圖貼說咨部外卽照實用實銷開單具報藉省一再造冊之煩徭賦上關

國計下係民生綜計南路征糧每年二十餘萬石將來兵制酌改需糧較少日久積儲勢難多備倉廩變價又苦無從銷售潮腐堪虞臣錦棠擬飭各屬於此後科定賦役時權其輕重或有前章稍重者仰體

皇仁卽予酌減征糧較多之處核計兵食之外所餘猶多卽行折行銀兩湊充度支以爲涓滴之助庶倉糧不至霉朽而邊儲得以常充矣除屯田兵制及未盡事宜容俟會商妥籌隨時具

奏外所有承准部覆准設新疆南路道廳州縣各官現擬委員前往試署以便詳察地勢民情續陳未盡事宜並籌現辦情形各緣由是否有當恭摺具陳伏乞

聖鑒訓示施行

光緒九年四月二十日

請獎叙興築烏垣城工片

竊臣接准烏魯木齊提臣金運昌咨開烏垣自經兵燹城垣並門樓門洞以及四隅角樓旣已坍塌光緒七年春間調集在防馬步

各營分段興築現將垣牆四圍加高培厚一律完固至四門城樓四隅角樓四城門洞南北月城門洞於光緒七年六月動工至八年九月止由升任迪化直隸州知陶州模及現署知州劉兆梅先後監修完竣所有置買瓦甎鐵木各項並員弁匠工兵勇人等津貼稿賞共用銀一萬一百一十二兩五錢八分又續建堆房抱舍十二間火藥局九間義學十一間並濠溝橋梁共用銀一千三百四十一兩五錢六分二釐綜計共用銀一萬一千四百五十四兩一錢四分二釐除由陶模稟請在於迪化善後房租及古城釐金項下撥用銀三千九百一十一兩五錢外實不敷銀七千五百四十二兩六錢四分二釐因自念身受

國恩毫無報稱不敷銀兩已於歷年所餘薪工項下動支作爲捐修之款相應開單咨請

奏咨立案等因。維新疆自戡定後各處城垣半多殘燬亟須次第修理以資捍衛祇苦工程浩大籌款維艱金運昌承修之迪化

州城殘塌已久工鉅費繁共用銀一萬一千四百餘兩雖與例估不無軒輊然以塞外物價騰昂覈較尙屬節省業經臣飭署鎮迪道陳寶善逐一勘驗加結具報茲據陳寶善詳覆履勘委係工堅料實並無浮冒加具印結懇請具

奏前來臣查前項城工經費僅於善後房租及古城釐金項下撥支銀三千九百一十一兩五錢自應准其動用已據署迪化直隸州知州劉兆梅造冊加結呈由行營糧台核轉彙案報部核銷其由該提督捐修之款應請免其造報並懇

天恩俯准飭部立案至該提督捐修鉅款克竣要工應否仰懇恩施准予議叙伏候

聖裁其在事出力員弁人等督任奮揭始終罔懈不無微勞可否由臣彙案擇尤酌保之處出自

逾格鴻慈除咨戶工二部外謹恭摺具陳伏乞

聖鑒訓示

光緒九年九月二十六日

請給南北兩路官員辦公津貼摺

竊維制祿馭富道貴有以養其廉而時異勢殊事貴有以通其變
新疆土曠人稀殘破之餘流亡甫集貧寡交乘北路鎮迪轄境歷
年招徠安集至今大縣人民多者不過一二千戶少者數百戶回
疆戶口雖較繁殷惟淪胥日久疊遭安夷搜括席捲杆柚罄空其
瑪納巴什喀喇沙爾拜城等處蹂躪特甚子遺之民翊戴

皇仁彌殷瞻就際茲邊圉粗輯百廢待興慎選廉能與民休息久
安長治之道無逾於此顧土敞水煩各有所妨莅官任事宜慮其
始一官一邑庇民必有以庇身羣策羣力稱事始期於先事廉工
應領之數與其日用必需之數兩相較籌當使賢者優爲而中才
以次舉能勉安所遇然後能責其盡職興廉懲貪可得而言矣伏
查南疆新設郡縣廉奉工食部議准照鎮迪道屬賦役掛支率由
舊章京屬大公至正惟道員廉銀歲祇三千兩同知直隸州知州
八百兩通判知縣六百兩俸工役食照章減折支給爲數更屬無

多就地別無租課羨餘堪資墊補而地介西表今茲州縣所治去京師遠者萬有餘里近亦八九千里羣吏奉檄之官車馬騶從之費亦已數倍尋常而幕友丁胥薪工有費迎送餽牽慶弔有費俯仰事畜服食有費荒徼殘區百物艱貴家常粗糲動費不貲入不償出具大彰明較著者也曩者駐軍前敵創舉善後嚴禁攤派八城局費薪糧各視其地之衝僻事之繁簡以爲差等節省之中仍示以寬大而事後熟察且有因公負累者迪屬卸署人員入塞半無資斧所稔知方今全疆善後未能卽了南疆工役正殷一旦易局而官勞費如前而廉項入款較前頓減雖有廉吏必不能支官病民窮事何以舉迨至盤查交代追取虧挪甚且貪墨敗官重干例議應得之咎夫後何辭而致此之由究難免於納之罪而敗其資者忝邊寄權轄全疆謀慮之疏壅蔽之尤後將誰執其咎哉竊見乾隆間移徙陝甘滿營實邊駐防其時官兵馬甲餼糧科草均按雙分支給緣管換防官兵既支行糧其家屬仍准全支

坐糧

祖宗厚澤深仁雖下逮戍卒征夫罔不曲盡其情各遂所欲成憲昭垂至足欽矣臣愚擬懇

天恩允照黔省奏准津貼州縣新章由臣分別酌擬請

旨遵行通計南北兩路合吐哈兩廳共道廳州縣分防縣丞二十五員缺又原設佐雜教職十四員缺內巡道三員缺分相等擬請每員每月給津貼銀一百兩歲各加銀一千二百兩其北路之鎮西迪化昌吉阜康南路之喀喇沙爾瑪納巴什拜城同通州縣七缺與哈密通判均屬著名瘠苦擬請每員各月給津貼銀六十兩歲各加銀七百二十兩又北路鎮西迪化阜昌四廳州縣現任之學正訓導吏目典史巡檢照磨合哈密巡檢共八員缺擬請每員月給津貼銀十六兩歲共加銀一千五百三十六兩懸缺未設各雜職及南服新募書吏應加口分均請由臣隨時察核

奏明辦理其餘缺分稍優之處北如奇臺綏來濟木薩呼圖壁共

知縣縣丞巡檢典史正雜七缺南如葉和喀英阿烏庫車合吐魯番闢展共同知州縣巡檢正雜十三缺土沃民殷均請毋庸津貼以示區別以上津貼巡道正雜各官通共歲需實銀一萬八百九十兩如荷

鴻慈允准均請從此次奉

旨之日起支以清起訖仍依前次部覆各官廉俸公費統歸西征糧臺軍需支銷項下彙總開報一俟地方復元卽由督臣察核

奏請停止無缺之員著無員之缺均請全支廉銀以示體恤似此辦理庶苦樂均適官民稱便於地方吏治民生裨益匪淺所有新疆邊遠凋瘵南北兩路經始善後事繁費艱道員暨正雜官吏擬按缺分優絀分別酌給津貼以資辦公而均苦樂各緣由謹會同陝甘總督臣譚鍾麟烏魯木齊都統臣恭鐸幫辦軍務廣東陸路提督臣張曜合詞恭摺具

奏愚昧之見是否有當伏乞

聖鑒裁奪施行

光緒九年十
一月初四日

新疆圖志卷一百

奏議十

城郭 河渠 三

新疆新設郡縣工費懇撥實餉摺

請將奇台縣治移建古城片

南路城辦工作礙難中止仍懇飭發銀兩片

新疆南路擬設佐雜及分防巡檢各缺摺

請加鎮迪道按察使銜摺

巴烏滿營移併古城並請改設城守尉摺

巡撫布政使廉俸應照江蘇例支給片

新疆建省請改設添設各官摺

哈密通判劃歸鎮迪道管轄並添設書役片

裁撤糧員改設同知巡檢等缺摺

酌裁回官懇 賞回目頂戴摺

新設古城城守尉擬由撫臣兼轄請 旨簡放摺

估修新疆省城城垣及撫藩衙署等工摺

古城修理完竣哈密將次完工請立案片

新設佐雜並添設正佐各官請飭鑄印頒發摺

估修吐魯番廳綏來縣兩城需用數目請立案片

南疆新設郡縣工費懇撥實餉摺

竊新疆地處極邊輻員遼濶要荒之外屏蔽爲先南路增置郡縣城垣衙署等工勢不容已。於本年四月間業將籌辦大概並懇飭撥的款各情形奏明在案惟邊荒燼餘民窮財竭補苴經始事同締造當茲時局至艱餉需奇絀

皇太后

皇上憂勤惕厲

儉德日崇雖司農歲進正供且充

國用受

恩深重具有天良苟事所得已餉價稍資挹注局勢尙堪勉支何

敢以財用細微上煩

慈繫惟前項工程。與張曜往復通籌大率城垣爲重土工爲多回部子遺殘喘重隸

聖化極應謹體

皇仁輕徭薄賦與之休息以故土工大凡專資勇丁之力兼雇赤貧以工代賑竭力役絕攤派費省事集而民和其便一也。等初議城垣因創隨宜各城衙署通就官局補葺藉省工費其便二也。需材隨地購辦工雇回匠黜華崇實其便三也。曩接准部覆比將前事等因咨行遵辦並檄飭各營局確估工費分齋。與張曜會核定奪一面熟察緩急次第興工去後茲據各該營局陸續詳齋估冊具報興工前來。逐加覈閱城工可因舊制改作者東僅庫車烏什西僅喀英葉瑪暨疏附縣城七處其東路之喀喇沙爾阿克蘇拜城西路之和闐直隸州城于葉兩縣城均待擇吉另建蓋滄桑更變今昔迥殊或遺址雖存而近時市集居民距城寫遠

官民睽隔於事非宜度地因時勢不容已隴邊土性斥鹵下流逾甚土城年久剝落塌圯鮮可因依創制之初土程允宜堅固庶能一勞永逸費不虛糜以故新建之城六城根礮臺雉堞墜門一律通用燒甌雜石城樓官廨鳩工庀材均取堅樸改修之城七去其潮離輸土重築添修城樓礮臺間須推廣城基工料所費亦復不少官司所治倉庫廨獄暨同城佐雜衙門科房傳舍嚮與堂事相聯屬例建

賢廟亦應從簡隨署兼營善後等局原本草創改局爲署格於程式而臨民莅事諸多未宜礙難拘牽原議者勢也邊疆百物奇昂工匠稀貴入山取材路長脚多動費鉅款通盤確估八城東西兩道所轄新設道廳州縣十五員缺計共城工十三起衙署十五起除崇武楚湘董定諸軍幫修土工外所需鐵木甌石陶瓦物料匠役薪工犒賞諸欸節之又節通共需實銀三十七萬四千兩有奇工作適際環興鉅款頓增勢難停待就地絕無絲毫進項可籌協

餉只有此數如本年遵照部議原盼解足八成現屆十月計算協解成數除劃抵撥還華洋商債外實在解甘銀僅一百二十餘萬兩征軍餉需暨權轄之南北兩路印委人役薪廉正雜諸款統恃協餉通融縱令暢解如常出入祇足相抵矧今入款既大遜於往常而一耗於清還商債坐佔實餉三百萬兩之多再耗於續裁卓勝五營代晉省挪空現餉二十餘萬兩而前項城工衙署專款積少成鉅又需銀三十七萬四千兩仍待由萬艱之軍餉點綴通挪嚮使督固執前議到甘之百餘萬兩必與軍分成提用局勢早已難措幸譚鍾麟深維大局餉饋必先塞外遇有急需設法摒湊飛輓時懼不給體

國之忠悉慮之公固可謂誼篤同舟矣昨與書云息借洋款部議停止自應恪遵惟念來源日見枯竭催索鮮應羅掘成虛稔知軍前竭後空困窘萬狀擬暫嚮陝鄂華商籌借銀兩湊解西來權濟眉急而議之成否數之多寡仍難逆計也近迫積年挪空之

餉填補無方而及時應出之需點金乏術其城工衙署專款爲數既鉅需用正殷向屬虛懸無著如_臣構昧委實難支再四維籌惟有籲懇

聖慈俯念郡縣建置關重邊荒窮窘異常

恩准飭撥部儲實餉三十七萬四千兩俾濟要需而維事局邊事幸甚_臣幸甚此項部撥銀兩仍

飭就各省關欠解協甘軍餉項下定限照數解部歸還以重庫款不勝感悚屏營之至除遵造城垣衙署工段工料簡明切實估冊分別另案咨部查覈外所有南疆新設郡縣建署一切工費浩繁無可籌措籲懇

天恩飭撥實餉以濟要工而維事局各緣由是否有當謹會同陝甘總督_臣譚鍾麟幫辦軍務廣東陸路提督_臣張曜合詞瀝陳伏乞

聖鑒訓示

光緒九年十一月初九日

大臣奉

部議奏欽此

請將奇台縣治移建古城片

竊奇台縣治屏營驛逼近天山之陰山原高亢周迴數里內無井泉河渠之利官民汲引冬恃冰窖春夏則恃天山雪水融化引流作瀦偶值亢旱雪少輒患枯渴就地掘井恒深至百餘仞莫能及泉該縣城關附郭嚮少居民商旅不集亦有由也乾隆建城之初蓋取建瓴臨下之意且與木壘古城兩營東西相距各九十里縣治居中聯絡防守兩資已耳不若古城地當孔道東接巴里坤西達烏垣南屏天山北至科布多東北通烏里雅蘇台西南爲出吐魯番間道形勢允稱扼要且其地適濱水磨河格根河下瀉之衝衆流所歸故其土性沃衍人煙稠密縣境東西地頭二三屯各腴區密週環抱樵汲芻糧取購近便駐師興屯於事攸宜建官出治尤爲允協前烏魯木齊都統臣景廉督師西征特設軍府於此就

乎遠古城之東築兩土城蟬接鱗次委官試署商民市集亦卽附麗其間意至善也現查其倚南一堡業經增修完固作爲乎遠新城古城領隊與其協佐領官兵駐紮其中仍景廉軍府之舊也北城嚮爲市集惟其城根北邊坐落水磨河外無護隄隙地難議增改垣中南北相距僅五十七丈城身高只丈餘厚只五六尺規模太狹查其西關卽古城營舊堡基址尙存平廣爽塏漸已由聚而邑前據署知縣甘承謨稟陳前由請將奇台縣治改建古城前來比檄委署鎮迪道陳寶善履勘詳奪去後茲據陳寶善委勘詳覆前情無異並准陝甘督臣譚鍾麟烏魯木齊都統臣恭鐸咨請會奏改建到臣行營臣維經費至艱建置關重事苟得已自以仍舊爲宜惟城治務擇形勝便民茲按奇古兩相比較利病相去判若天淵則奇台縣治移建古城洵屬正辦譚鍾麟恭鐸來咨意見昭合如蒙

聖恩允准再由臣調營幫工藉資節省古城營遊擊千把經制額

外各官弁暨分防奇台汛把總均應照舊駐紮其古城巡檢應請
移置奇台兼管驛丞事務奇臺典史應隨印官移駐各專責成俟
奉

旨後_臣當欽遵檄飭確估照例造具工段清冊咨部查覈所需經
費由_臣附入南路城工彙案請銷以照覈實_臣爲地方起見是否
有當謹會同陝甘總督_臣譚鍾麟烏魯木齊都統_臣恭鐸合詞附
片具陳伏乞

聖鑒訓示

光緒九年十
一月初四日

南路城解工作礙難中止仍懇飭發銀兩片

竊_臣於上年十一月將估計修理南路新設各官城署一切恭須
銀三十七萬四千兩奏懇

飭撥部款嗣准戶部鈔咨會議摺稿以部庫入不敷出實難輕予
外撥擬由江西湖北湖南江南山西四川及河東道各處共提銀
十八萬兩限十年五月以前如數解交甘肅糧台即將應建城垣

礮台等工趕緊興修官廨從緩辦理奉

旨依議欽此等因承准之餘伏見

朝廷屢念西陲正當賑務紛乘海防喫緊特

准指撥款目欽感曷言此項工用所迫計各省必能先其所急如期趕解除一面飛催外其衙署各項部議令暫緩意在少紓餉力自應恪遵惟查南疆改設官治原欲一新纏回之耳目俾滌舊染之汚公衙須有定所規制亦有定程非爲官吏之安居乃爲民望之所屬軍興以來腹地州縣衙署間尙未及修復誠有如部議所云者然其民情迥異邊氓兼值互市通商立制之初未易過從簡易蓋顯以示

天朝之威儀卽隱以杜外夷之窺伺自接准改設官治之部覆還籌興修城署倉監

壇廟用資保障而具規模飭各營局酌估初議需銀八十餘萬經再三駁飭凡舊有之寸木片石均令湊集歸於實用土工則多

屬之防管責以倍加奮勉隨處撙節通計至少需銀三十七萬四千兩早飭一律動工經費權於軍餉騰挪本待請撥部銀遂爲彌補今城工准撥十八萬兩衙署緩辦工作已興礙難中止趁此管勇助勞事半功倍官制既經大備吏治較易講求已往之勞費不虛將來之苛派可免綏輯邊荒此其尤大要也際茲時事多艱司農每形支絀何敢更申前請祇以工難停罷萬不獲已擬請將未撥之十九萬四千兩仍懇

天恩飭部在於欠解西餉各省關照數限解以濟要需。忝膺重寄苟稍可以裁省無不力爲經畫刻下事局所關併修衙署各工綜計所費無多日後所全實大區區愚忱不勝感悚待命之至除咨部外謹會同陝甘總督譚鍾麟幫辦軍務廣東陸路提督張曜附片具陳伏乞

聖鑒訓示施行

光緒十年二月二十八日

新疆南路擬設佐雜及分防巡檢各缺摺

竊查南疆各廳州縣應設照磨吏目典史及各屬轄境遼闊須添
佐職分防經_臣等奏明承准部覆令由_臣等隨時體察情形會商
妥議奏請辦理在案茲據署喀什噶爾道員黃光達護理阿克蘇
道員陳名鈺等先後詳稱阿克蘇喀什噶爾兩道所轄廳州縣額
徵錢糧通應報道綜覈估撥彙總報銷並有須量爲折變者擬合
設道庫大使一員專管收支事件該庫大使衙署應修於道署儀
門之側其庫房則於道署大堂側起造以便主守其溫宿莎車和
闐疏勒四直隸州設立吏目各一員拜城于闐葉城疏附四縣設
立典史各一員喀什沙爾庫車烏什英吉沙爾瑪喇巴什五直隸
廳各設立照磨一員兼司監獄緝捕以上各廳州縣佐雜衙署均
緊接監獄俾專責成又阿克蘇舊城地當衝衝五方雜處擬添設
巡檢一員稽查匪類彈壓居民其餘各屬轄境較廣戶民隔居寫
遠者擬於喀喇沙爾所屬之布告爾適中地方設立巡檢一員葉
城縣現擬移建哈里克其沙車回城擬設巡檢一員資其就近

彈壓詳請核辦前來。伏查新疆土曠民稀佐雜各員原未可以多設惟邊遠遼濶長途戈壁誠有鞭長莫及之勢自應酌量添設藉資控制該道員黃光達等察看情形細心商酌所擬尙屬妥協應懇

天恩俯准設立南疆八城佐雜各員缺俾有專司而資治理至此項設立之分防巡檢各缺擬均作爲要缺由外揀補其同城佐雜各員缺照例概歸部選仍懇照吉林新設民官各缺成案統歸因地擇人由外先行揀補一次又。原奏葉城縣治設立葉爾羌回城于閩縣治設立哈拉哈什現據黃光達詳稱該兩縣治各應改設所轄適中之地擬將葉城縣移建哈里克地方于閩縣治移建克里雅地方庶資兼顧且免添設分防佐雜等情。覆查無異批令照辦相應請

旨飭部核覆以便遵循除未盡事宜容查明陸續具

奏外所有新疆南路道廳州縣擬設佐雜及分防巡檢員缺各緣

由謹會同督臣譚鍾麟合詞恭摺具陳伏乞

聖鑒訓示施行

光緒十年十一月二十六日

請加鎮迪道按察使銜摺

竊新疆刑名前經臣奏奉

諭旨准其變通辦理按季摘由彙報以歸簡易南路設官以後所有各屬命盜重案經臣飭由該管道州層遞覈轉再由臣悉心察覈定讞歷經辦理在案然獄者民之大命法者

國之大經如情罪或失其平其間出入等差關係非淺必賴有專管之官始能殫精研究胥歸允當。於光緒八年七月初三日奏請添設甘肅新疆巡撫布政使摺內聲明鎮道員請仍照福建臺灣道成例

準加按察使銜兼管全疆刑名驛傳事務嗣經部議須俟南路入城建置事宜辦有頭緒再行酌量具奏奉

旨依議欽此欽遵在案伏查南路建置諸務隨時舉辦漸有規模

與藩司魏光燾業於本年四月初二二十六等日先後晉駐烏魯木齊省垣籌商部署頭緒繁多而刑名尤在所重若仍漫無總滙辦理恐涉紛歧合無仰懇

天恩俯准將鎮迪巡道加按察使銜所有全疆刑名統歸該道員總覈詳轉仍兼管驛傳事務俾整綱飭紀得專責成實於邊徼刑政深有裨益再例載距省寫遠之府州所屬各州縣承審案件罪應斬絞及命案內量減軍流人犯解省勘轉其尋常遺軍流徒各犯均歸該管巡道就近審轉等語新疆情形核與內地迥別南路極邊州縣距省五六千里之遙若斬絞及命案內量減軍流人犯照例解省勘轉匪特罪犯人證拖累難堪且恐長途戈壁易滋疏脫然刑貴詳慎全不厪遞轉勘又不足以示慎重謹體

皇上矜恤庶獄之意擬再量爲變通距省寫遠所屬一切案件均由該管巡道核轉設案情不確卽由該管巡道提審訊問統咨鎮迪道兼按察使銜衙門詳加核定以期周妥如蒙

俞允應懇

聖恩飭部換頒關防俾昭信守其餘未盡事宜容_臣與將軍督_臣等隨時商酌奏明請

旨施行所有鎮迪巡道擬懇准加按察使銜緣由是否有當謹會同陝甘總督_臣譚鍾麟恭摺具陳伏乞

聖鑒訓示

光緒十一年五月十三日

巴烏滿營移併古城並請改設城守尉摺

竊_臣錦棠前遵部議請將舊有之烏魯木齊巴里坤古城等處旗丁歸併伊犁旗營於光緒十年四月二十八日具奏奉

旨允准欽遵在案旋准伊犁將軍_臣金順咨到奏稿內稱伊犁各營現存官兵及丁口共六萬七千八百餘員名擬就各營原有官兵挑補五千人訓練下餘兵丁足敷額數若再將烏魯木齊各城旗營官兵歸併伊犁更屬無可位置塔爾巴哈台爲北路邊要向無駐防之兵承平時係各處撥兵換防現擬將換防之例停止該

城僅恃客兵終非久計請將烏魯木齊各城旗營官兵遷歸塔城
作爲塔城永遠駐防等因亦經部議允准茲准護巴里坤領隊大
臣金貴咨據各旗馬步兵丁等稟稱兵丁等邊城駐守世受國恩
憶自逆回蠢動疊被圍攻力守危城外援俱絕壯丁迎敵婦女登
陣幸獲無恙旋遇古城阜康之變千里赴援繼復東勦哈密叛回
冒雪衝鋒傷亡尤衆其存者又頻遭荒歉餬口維艱全疆底定以
來賴歷任各領隊加意拊循少能蘇息而積困之後生計仍屬拮
据現聞議令遷駐塔城該處毗連俄界竊恐凋敝之餘難資禦侮
且地隔巴城近三千里先人墳墓祭掃尤難稟請咨轉核辦前來
等伏查新疆自乾隆年間設立巴里坤古城吐魯番庫爾喀喇
烏蘇烏魯木齊五處領隊以都統轄之而悉歸伊犁將軍總統節
制提綱挈領成法昭然及同治初年逆回不靖除庫爾喀喇烏蘇
專管蒙古游牧向無滿營不計外其吐魯番烏魯木齊古城各處
滿營額設兵丁散失殆盡惟巴里坤防營歷更艱險僅僅得存平

定以來吐魯番滿營未經復設其餘各營招集散亡人數終屬無幾此次新疆設立行省裁併營旗所有巴里坤等處滿營自應歸併伊犁庶符體例惟既經金順奏明伊犁兵數過多無從安插則遷徙伊犁之議自難強以必行至欲移駐塔城實多未便該處既非沃壤又處極邊向來俱係換防不使邊兵久戍今則與俄偪處防兵尤貴於精雖議停止換防變通營制自應由錫綸量爲部署若巴里坤各處之喘息僅存貧不中徙亦係實情若欲強以必行又非

朝廷所以軫恤邊兵之意臣等思維再四亟宜改圖未便以成議在先少事遷就案查臣升泰接管卷內光緒九年五月前都統臣恭鐸具奏巴里坤著名寒瘠餉運艱難請將該處滿營移駐烏魯木齊其所遺戶地官屯可悉數留給鎮標綠營管理又古城爲北路咽喉重地該旗人數過少不敷分防請由歸化城滿營間散挑選若干准其攜眷移駐古城以資扼要奏奉

諭旨允准欽遵在案竊維恭鐸所奏其時新疆行省議尚未定烏魯木齊新築鞏甯城廓其有容移駐旗營自無不可今烏魯木齊定爲省治設官分職情事頓殊舊有旗營尙須遷徙自未便更從增置至古城地當衝要東接巴里坤西達烏魯木齊南並天山北至科布多東北通烏里雅蘇臺西南爲出吐魯番間道形勢便利亟爲增設重兵以資控馭誠有如恭鐸所奏者。錦棠前請將奇臺縣治移建古城亦誠以地利所存不容坐廢也今巴里坤等處滿管遷塔遷伊旣爲成見而古城一處尙待增防以應遷之兵置應防之地其便一毋庸更向歸化城滿管挑選間散節勞省費其便二相距不遠遷徙不難旣遷之後卽遇有請假省墳之事往返不過旬日其便三上年奏

准於古城度地修造新城以便奇臺移治現在城工告竣旣議移駐滿管則奇臺可暫仍舊治異日滿管居止卽可因其已成祇須添蓋營房毋庸更議城工經費其便四巴里坤現有鎮標綠營足

資鎮守可無須滿營駐防古城土膏沃衍素係產糧之區非若巴里坤地氣苦寒歲多不熟生養休息精足易期其便五謹案乾隆三十九年因巴里坤糧運不給始定分駐古城是該處移防本有成案各營旗遷併於此需用糧石就地取給無煩由他處採運所省實多此時既未便遷併伊犁則舍此實無善策也。錦棠始謀未豫殊切悚惶現經返覆熟商意見相合伏乞

聖明采擇其一切遷徙應辦事宜容再妥籌具

奏現在該旗既議歸併領隊協領各員缺並經奉

旨裁撤查烏魯木齊古城現存員弁兵丁共二百九十五員名巴里坤現存員弁兵丁七百七十九員名擬倣照河南山西甘肅莊浪滿營之例改設城守尉一員如蒙

俞允應請

旨迅賜簡放以重職守其佐領防禦以下官應否各仍其舊容俟

城守尉

簡放有員再行會商核辦又查城守尉山西二員一歸巡撫兼轄一歸綏遠城將軍管轄河南一員歸巡撫兼轄莊浪城守尉歸涼州副都統管轄此次議設古城城守尉應否由新疆巡撫兼轄或由伊犁將軍管轄之處恭候

欽定。等未敢擅擬所有議改巴里坤烏魯木齊滿營歸併古城並請改設城守尉一員以資統率各緣由謹會同伊犁將軍臣金順陝甘總督臣譚鍾麟合詞具

奏愚昧之見是否有當伏乞

聖鑒訓示施行

光緒十一年五月二十五日

巡撫布政使廉俸應照江蘇例支給片

竊新疆初建行省南路添設阿克蘇喀什噶爾兩道屬正佐各官應支廉項等銀均經部臣先後比照鎮迪道成例奏奉

恩准行令欽遵辦理各在案臣查鎮迪道廳州縣均於應領廉俸外各酌加公費銀兩推原立法之初蓋以新疆遠繫絕域一官赴

任車馬服物幕賓僕從以及歲時一切不可知之費較之關內不啻倍蓰特予從寬酌定此次南疆各官部。比照辦理亦猶古者議增吏俸之意。與藩司魏光燾業於本年四月初二十六等日先後抵任一切事宜均須釐定廉俸亦其一端查。前奏設甘肅新疆巡撫布政使員缺係倣照江蘇建置大畧辦理所有撫藩司歲支廉俸應否比照江蘇巡撫布政使成例支用以符原奏仍照關外各官章程酌加公費以資辦公應請

旨飭部核覆以便遵辦是否有當謹會同陝甘督。譚鍾麟附片具陳伏乞

聖鑒訓示

光緒十一年七月十六日

新疆建省請改設添設各官摺

竊照新疆改建行省治迪化州城所有省會應設各官自應分別添改除臬司仍照原議無庸專設經。奏請加鎮迪道按察使銜兼管全疆刑名驛傳事務外惟省會應有首府附府應有首縣以

期指臂相使大小相維。前奏設甘肅新疆巡撫布政使摺內請改設迪化府縣等官。嗣經部議應俟南路八城建置事宜辦有頭緒再行酌量具奏奉

旨依議欽此。欽遵在案。伏查南路建置諸務隨時舉辦漸有規模。與藩司魏光燾業經先後抵任籌辦一切需員臂助省會各官未可再緩。應請升迪化直隸州爲迪化府。設知府一員。治迪化城。增置迪化縣知縣一員。爲附郭首縣。與迪化州原屬之昌吉綏來阜康奇臺共五縣均隸迪化府屬。遇事由該府核轉其迪化州原管之戶籍田賦驛刑考試及地方一切事宜概歸迪化縣經理。此外藩司衙門首領各有職司。擬請設布政使司經歷一員。又庫大使一員。專司庫務。庫擬請名新裕。至鎮迪道既兼刑名。應請設道庫大使兼按司獄一員。迪化府首領應設府經歷兼司獄一員。查迪化城舊有巡檢一員。爲稽查彈壓而設。現既建置省會情形不同。擬請卽裁該巡檢。缺改設府經歷。迪化縣應設典史一員。專司

監獄督捕擬請卽改迪化州吏目爲縣典史學官則迪化州原設學正一員兼管所屬各縣學務今升州爲府擬請升學正爲府教授照舊兼管各縣學事一俟將來學校大興再擬添設以省糜費以上各缺應定爲何項缺分俟設定後再行擬議辦理仍懇照吉林新設各缺酌補一次成案由外揀補一次庶於地方有裨據藩司魏光燾詳請具奏前來臣覆查無異合無仰懇

天恩俯准飭部核覆以便遵循除未盡事宜容俟查明陸續陳奏外所有省會各官擬請改設添設各緣由是否有當謹會同陝甘督臣譚鍾麟恭摺具陳伏乞

聖鑒訓示施行

光緒十一年七月十六日

哈密通判劃歸鎮迪道管轄並添設書役片

竊查哈密通判一缺向隸甘肅安肅道管轄光緒六年臣接綰

欽符經前陝甘督臣左宗棠奏稱將來議設行省必以哈密劃隸新疆形勢始合請將哈密及鎮迪道屬歸臣統轄嗣臣奏設甘肅

新疆巡撫布政使員缺亦曾聲明巡撫一員駐烏魯木齊管轄哈密以西南北兩路各道廳州縣現在行省設定與藩司魏光燾均經抵任哈密辦事幫辦大臣奉

旨裁撤該地方回務前左宗棠

奏准照吐魯番例由哈密通判兼管辦理數年漢回稱便通判一缺應請劃歸鎮迪道管轄遇事由該道核轉以專責成惟查賦役全書該廳向無額設書辦而兼理回務命盜詞訟概歸經理辦事需人歷任不無賠累茲既劃歸鎮迪道屬擬請倣照前烏魯木齊理事通判例添設書辦二名並原設各役四十二名工食銀兩及本官廉俸公費等項均請照理事通判章程支給以資辦公其哈密巡檢一缺亦請照開展巡檢開支俾歸一律據藩司魏光燾詳請具

奏前來臣覆核無異相應請

旨飭部議覆以憑遵辦是否有當謹會同陝甘督臣譚鍾麟附片

具陳伏乞

聖鑒訓示

光緒十一年
七月十六日

裁撤糧員改設同知巡檢等缺摺

竊查庫爾喀喇烏蘇舊設領隊大臣一員管理庫城精河土爾扈特遊牧及屯田事宜並設庫城糧員一員精河糧員一員由部揀派司理戶民糧務軍興以來糧員暫行由外委署查庫城爲西路衝衝東距迪化城六百九十里距綏來城三百五十里西達伊犁至精河界二百五十里北通塔城至塔城界三百三十里幅員廣濶地方扼要軍務初定游民商旅雜出其途兼有土爾扈特游牧民人稽查彈壓悉關緊要現在領隊員缺裁撤糧員既無地方之責竊恐難資鎮撫

臣前

奏設南北兩路驛站請將庫城精河兩處改臺爲驛歸該糧員經管嗣奉部咨覆准地方情形體制均與曩昔迥殊自應變通籌辦改設官員以期有裨但欲隸歸綏來則相距較遠鞭長莫及因查

庫城舊設縣丞後改同知於乾隆四十八年裁改糧員擬請仿照舊設裁汰糧員仍改設庫爾喀喇烏蘇撫民直隸同知一員兼理事銜管理地方戶籍田賦刑案兼管土爾扈特游牧諸事宜並轄精河屬境精河西與伊犁接界相距二百二十里東接庫城界一百七十五里舊設典史後改糧員所管四驛轄境亦廣擬請裁糧員缺設分防驛糧巡檢一員管理戶官驛站緝捕等事仍隸同知管轄遇事由同知該轉其同知仍隸道屬以專責成又鎮迪道舊轄喀喇巴爾噶遜糧員一員地在迪化南一百八十里原管戶民本由迪化分撥兵燹後員缺久懸戶民均係由州經管。前奏請升迪化直隸州爲迪化府增迪化縣爲附郭首縣該處距城較近一切事宜縣中自能兼顧其原設糧員一缺亦應裁汰庫車精河原額戶民屯兵及征納額糧房租園租等項均歷有成案可考現在戶口凋零兵屯未復一切征收雖屬寥寥然爲撫綏彈壓起見似因時制宜莫要於此官制既定得人而理數年之後自必日有

起色其改設各官應定爲何項缺分俟設定後再行擬議辦理仍
懇照吉林新設各缺酌補一次成案由外先行揀補一次據藩司
魏光燾詳請具

奏前來 覆查無異合無仰懇

天恩俯念邊疆員缺緊要量有變正以資整頓實於地方大有裨
益如蒙

俞允應請

飭部核覆示遵所有擬請裁撤庫爾喀喇烏蘇精河喀喇巴爾噶
遜三糧員改設同知巡檢各缺緣由是否有當謹會同伊犁將軍
金順陝甘總督譚鍾麟署烏魯木齊都統升泰恭摺具陳
伏乞

聖鑒訓示

光緒十一年
九月二十日

酌裁回官懇 賞回目頂戴摺

竊 於光緒八年七月間奏請將阿奇木等伯克裁去仍准戴用

翎頂經理藩院遵

旨議覆各城裁去伯克體制是否合宜未敢率行議准請

飭再行體察情形悉心妥議覆奏嗣於委署新設南路道廳州縣各官摺內聲明擬將伯克分撥爲吏戶禮兵刑工各書復經部議係爲隨時變通期於兩有裨益起見似應准如所請惟伯克各有專責從未議及更張一旦驟加裁改回民能否相安似難遙計請

飭酌度情形妥議核辦等因先後奏奉

諭旨依議欽此欽遵各在案竊維回疆民事從前委之阿奇木伯克等官原以約束部衆乃該回目等往往倚權藉勢魚肉鄉民爲所欲爲毫無顧忌纏回語言文字隔閡不通民怨沸騰而下情無由上達繼遭安夷之變該回目等苛酷尤甚橫征暴斂剝靡遺民命不絕如縷幸賴

皇威遐暢

天戈所指莫不聞風披靡舉二萬餘里之疆土還隸版圖使邊民重觀天日。曩年規復南疆每於進克一城卽咨商前督左宗棠揀員設局辦理善後招集流亡籌給牛籽農具疏濬溝渠使之盡力耕作輕徭薄賦與民休息數年以來荒蕪漸闢戶口日增地方漸有起色其大小伯克額缺雖亦揀員署理究竟地方應辦事宜均責成各該局員察看情形稟承遵辦但藉回目傳頒教令初未嘗假以事權現在南路新設道廳州縣各官委署已歷年餘規模漸具不乘此時量爲變通且過此以往又必有積重難返之勢况阿奇木等承充伯克多係三品四品州縣官階尙居其下鄉愚無知恐啟玩狎漸而與州縣儼然並立於制亦不相宜在部院諸臣以事屬更張自應長思熟慮而見聞既確計非裁去回官實無以蘇民困而言治理上年通飭南路各廳州縣傳集各該城關阿奇木等伯克剴切開導諭以在所必裁之故准其各留原品頂戴仍視城關事務繁簡分設鄉約專司稽查卽於裁缺之回目選

令承充並視品級之崇卑分送道廳州縣衙門充當書吏鄉約酌給租糧書吏酌給口食以資養贍不願者聽其鄉莊地遠驟難戶曉舊有之伯克暫仍不裁遇有缺額亦不另補以期漸照城關一律改設鄉約現據各屬稟報自試裁城關伯克後經年以來甚覺相安毫無缺望回民去其壅蔽意亦漸與官親若更需以時日言語相通則疾苦可以自陳而弊竇可期永絕矣容再由督飭各該地方官隨時察看務令措置得宜不敢稍涉因循憚於改易亦不敢過於操切致啟事端以仰副

朝廷晷顧西陲至意惟各城出力回目前以軍務方殷正資驅使或派令鄉導或委辦軍糧頗能不辭勞瘁若不立予獎勵無以作其急公向義之心當經與前督左宗棠前幫辦軍務張曜隨意核酌與其擬保翎頂行知俟彙案奏請

獎叙現在歷年既久未便沒其前勞合無仰懇

天恩俯念該回目等効力疆場

允照等擬保行知

賞給翎頂以昭激勸出自

逾格鴻慈謹將擬保各回目翎頂繕具清單恭呈

御覽所有酌裁回官並懇

恩賞給回目翎頂各緣由謹繕摺具陳伏乞

聖鑒訓示施行

光緒十一年十月二十七日

新設古城城守尉擬由撫臣兼轄請旨簡放摺

竊照光緒十一年十一月二十八日准兵部咨遵

旨議覆劉錦棠等奏請將巴里坤等處滿營歸併古城並添設城守尉一摺古城地當衝要旗營歸併於此自不可無專員鈐束以重責成該處本有領隊等官業已奉

旨裁撤應如該撫等所請准其添設城守尉一員其佐領防禦以下應否仍舊及新設城守尉歸於何處管轄應請

旨飭下伊犁將軍新疆巡撫體察道里形勢會商奏明辦理等因

奉

旨依議欽此欽遵咨行前來竊維設官分職

國家自有常經。等何容置議惟新疆事經創始無可率循此次議設城守尉尚未酌定由何處管轄經部議令等會商具

奏敢不悉心以熟籌之查古城爲新疆東路距省四百餘里聲息相通伊犁在其西二千餘里山川綿亘中隔數城文報往來動需時日以道里形勢而論遠近判然不同等往復函商意見相合擬請將新設古城城守尉援照河南及山西太原城守尉之例歸於新疆巡撫臣兼轄是否有當伏候

聖明采擇現在領隊等官旣已奉

旨裁撤各旗營兵丁誠不可無專員鈴束且歸併古城之議發已經年各旗營計日待遷亦不容再緩新設城守尉員缺蒙

恩俞允應請

旨迅賜簡放以便各旗營得以從速遷移至佐領防禦等官應否

仍舊應俟城守尉到任再行會商核辦其各旗管兵丁花名清冊現飭分別造報俟造齊到日再當送部備查所有新設古城城守尉遵議會商擬由撫臣兼轄各緣由謹會同陝甘總督譚鍾麟合詞具陳伏乞

聖鑒訓示

光緒十二年二月十二日

估修新疆省城城垣及撫藩衙署等工摺

竊據藩司魏光燾詳稱迪化州城前經定爲新疆省治該處原建滿漢兩城祇西北隅向有垣牆迤邐相接其東南一帶勢若箕張不相聯屬且城身低薄於省城要地亦不相宜現飭印委各員會同履勘擬將漢城東北之便門及滿城之南右門一律剷平卽於滿城之東南隅起接至漢城南門止展築城基使兩城合而爲一並於舊城三面增高培厚使與新築城身一律完固估計應用銀六萬三千二百餘兩又創建撫臣衙署估銀二萬九千餘兩藩司衙署估銀二萬五千餘兩以上各工俱擬照向章派營勇輪流

應役詳請核辦前來臣查南路城垣及衙署等工前經臣奏請撥款擇要興修奉

旨允准欽遵在案迪化係新疆北路舊有兩城形勢悉皆狹隘今既定爲省治自應量加修葺擴而充之庶地宜民居參相得也至撫藩衙署體制攸關非度地興工亦不足以示等威而定民志除飭撙節動用不得稍有浮濫以重餉需仍俟各項工竣核實具報以憑咨部核銷外所有估修新疆省城城垣及撫藩衙署等工理合先行陳明請

旨飭部立案是否有當謹會同陝甘總督臣譚鍾麟恭摺具奏伏乞

聖鑒訓示

光緒十二年二月二十一日

古城修理完竣哈密將次完工請立案片

竊新疆南路城垣等工既經擇要次第興修北路除省城專摺奏明辦理外其餘廳縣有無要工自應一體查明酌量舉辦古城毗

連外部東通歸化包頭商賈所趨人煙輻輳原議以奇臺縣治移設於此當就市廛之外建築城垣樓堞池隍悉皆備具現議歸併旗營添設城守尉一員駐防其地自可因其已成無煩更置又哈密爲南北通衢設成屯糧悉關緊要舊有城垣規模狹小當由印委各員會勘興工擴充舊式查兩處工程悉藉各防營勇丁之力輪流合作十日犒賞一次省費實多惟木石工料皆由遠道搬運而來腳價未能過少古城計用銀二萬九千餘兩哈密估用銀二萬六千餘兩現在古城工已告竣哈密亦將次完工據糧臺司道彙詳前來_臣覆核無異除飭俟工竣併案報銷外謹會同陝甘總督_臣譚鍾麟附片陳明伏乞

聖鑒訓飭示部立案施行

光緒十二年二月二十一日

新設佐雜並添設正佐各官請飭鑄印頒發摺

竊查新疆南路八城新設巡檢照磨吏目典史又省城添設改設迪化府縣並首領佐雜以及庫爾喀喇烏蘇精河糧員改設同知

巡檢各官均經先後接奉部文議准分別委員署理暫行刊給木質鈴記以資整頓各在案所有需用印信關防亟應鑄造頒發俾垂久遠又各直省每歲刊發時憲書例頒欽天監時憲書印存儲備用現在新設行省所需時憲書印亦應請頒備用茲據藩司魏光燾詳請查照例章添鑄迪化府印迪化縣印布政司經歷印司庫大使印鎮迪道庫大使兼按司獄印阿克蘇喀什噶爾兩道庫大使印莎車州回城阿克蘇舊城布告爾精河四巡檢印迪化府儒學教授印迪化府經歷兼司獄印英吉沙爾烏什庫車喀喇沙爾四同知照磨印瑪喇巴什通判照磨兼司獄印各一顆欽天監時憲書印一顆庫爾喀喇烏蘇同知關防一顆開單呈請具奏前來。覆核無異相應請

旨飭部分別鑄造頒發啟用以昭信守除開具請單分咨各部查照外謹會同陝甘總督譚鍾麟恭摺具

奏伏乞

聖鑒訓示至吏目典史各官應用鈐記已飭藩司照例由外刊給

合併陳明

光緒十二年
八月三十日

估修吐魯番廳綏來縣兩城需用數目請立案片

竊據藩司魏光燾詳稱鎮迪道屬吐魯番爲南北咽喉重地該處城垣歷久未修兵燹以後城門甕洞腰角城樓均經坍塌四面城身垛牆亦多傾圮亟宜修理以資保衛又綏來縣城前於光緒二年賊盤踞時官軍圍攻多被開花礮擊損頽敝難堪雖經防營將城身稍爲補葺而頻年雨雪所侵仍多裂毀該縣爲省西門戶西通伊犁北達塔城地當衝繁最關緊要前據各該廳縣稟奉飭修並撥防營幫同版築一應工料仍飭切實估計在案茲據吐魯番同知估報此項城工土作以勇丁任役經費較減惟應需木料須採自伊拉湖山北計程七百餘里往返約須半月道遠連艱燒輒柴薪亦極昂貴計需銀一萬五千六百餘兩綏來縣城估用銀七千一百九十餘兩食糧在外查關外工程均經隨時奏報工竣核

實報銷該兩廳縣城工事同一律詳請一併具

奏前來

臣

覆查無異謹會同陝甘總督

臣

譚鍾麟附片陳明伏乞

聖鑒訓示勅部立案施行

光緒十二年
七月十六日

10